
Selected Poetry of Renowned Kashmiri Poets

Rewritten in Standardised Devanagari-Kashmiri by

M.K.Raina

Completed : 31.12.2004 ~ Updated 30.03.2020



सूची

दीना नाथ नाँदिम	०३
अमीन काँमिल	१७
वासुदेव रेह	१८
वहाब खार	२०
वाज़ु महमूद	२२
लाल लक्षमन	२४
हब्बु खोतून	३२
महजूर	४२
रसूल मीर	८६
अर्यनिमाल	१००
अब्दुल अहद आज़ाद	११९
महमूद गाँमी	१४१

इरादु दीना नाथ नाँदिम

वुशुन वुशुन, व्वजुल व्वजुल, व्वजुल व्वजुल, वुशुन वुशुन
वुशुन व्वजुल, व्वजुल वुशुन छु खून म्योन
जवान छुस तुफान ह्यू जनून म्योन

मे शोक छुम वॅशीरि प्यठ फिदा गछुन तु जान द्युन
बु वाव छुस मे क्याह कर्यम यि आवलुन, यि आवलुन
मलख बॅनिथ पज्या डलस अंदर बिहुन, खॅटिथ बिहुन
बनुन छु युप, दुशमनस छु द्युन लहुन, छु द्युन लहुन
तवय तवय वुशुन व्वजुल छु खून म्योन

बु शाद छुस करुन वतन आज़ाद छुम, आज़ाद छुम
वॅठ्युश वॅडिथ करुन चमन आबाद छुम, आबाद छुम
वदुन रिवुन पॅतिम ति वारु याद छुम मे याद छुम
नोवुय मे जोश छुम नोवुय इरादु छुम मुराद छुम
तवय तवय वुशुन व्वजुल छु खून म्योन

दजुन, दॅजिथ ग्रजुन मे कोर इशारु नारु वुजमलव
तलुक प्यतुक मे बोव सीर बेकरार ज़लज़लव
रगन मे खून बोर नोवुय, शॅहीद मज़ारु क्यव गुलव
शिहिन्य व्वफुन मे होव, ज़्यव मे अँन्य बहारु बुलबुलव
तवय तवय वुशुन व्वजुल छु खून म्योन

यँबरज़लन तु सुम्बलन, अँछन छु नोव खूमर ह्यू
गॅरीब ग्रीस्तिस करान अँमीर ज़ारु पारु ह्यू
बुडिथ, व्वमेदनुय छु ल्वकचार, नोव बहार ह्यू

दिलस अंदर मे प्रोन वलवलाह छु बेकरार ह्यू
तवय तवय वुशुन व्वजुल छु खून म्योन

दज़ान छि म्यॉन्य वन, यियम करार क्याह, करार क्याह
रिवान छी म्यॉन्य गुल, यियम मे वार क्याह मे वार क्याह
बु कौंसलन तु फौंसलन ति प्रारु क्याह, बु प्रारु क्याह
तुलुन मे नार छुम, कर्यम मे नार क्याह, मे नार क्याह
तवय तवय वुशुन व्वजुल छु खून म्योन

इराद छुम बु हावु यावनुक बहार आलमस
बु सौंतु वावु पौठ्य करु जिगर निसार आलमस
रंगन बु पनुनि खून, खारु म्वल बु वारु शबनमस
बॅनिथ बुन्युल तु नार करु बु लारु लार दुशमनस
तवय तवय वुशुन व्वजुल छु खून म्योन



बु ग्यवु नु अज़ दीना नाथ नाँदिम

बु ग्यवु नु अज़
गुलन तु बुलबुलन तु सुम्बलन तु मसवलन
हुंदुय खुमारु होत, तु मारु होत
मोदुर मोदुर तु नेंदरि होत, सु नगमु कांह
बु ग्यवु नु अज़ सु नगमु कांह
ति क्याज़ि अज़ ति क्याज़ि अज़
गुबारु गर्द जंगुची खटन छि रंग मसवलन
तु दुह्य बुशंगु जंगुकी च़टान छि चोंठ बुलबुलन
तु सुम्बलन अपौर्य यपौर्य गछान छ्वनिय छु हाँकलन
तु वुज़मलन बिहिथ अँछन छु ज़ाल ज़न
खँटिथ छि कोह तु बाल
तु कालु ओबुर संगरन वँलिथ छु नाल ज़न
बु ग्यवु नु अज़
तिक्याज़ि अज़ छि जंगबाज़ जालसाज़ होल गँडिथ
कँशीरि म्यानि ज़ाग ह्यथ

बु ग्यवु नु अज़
बु ग्यवु नु अज़, निशात, शालुमौर, आबशारु लालुज़ारुकुय नर्म नर्म पिशुल पिशुल
तु सब्ज़ सब्ज़ शबनमुक सु नगमु कांह
ति क्याज़ि अज़, ति क्याज़ि अज़
बे वायि जायि जायि तापु क्रायि ज़न छि ज़ाग ह्यथ
करान छि आयि ग्रायि युथ चलन यि म्योन बाग ह्यथ
तवय छु शाह अँदुर्य गोमुत गुलन छि लालु दाग ह्यथ

ज्वयन छु गुंगुरायि प्यठ ति पॅहरु ज़न
स्वतेयि कुकिलि वाह, तु ब्यूठ हारि वनुचि अँहरु ज़न
बु ग्यवु नु अज़
तिक्याज़ि अज़ छि जंगबाज़ जालसाज़ होल गँडिथ
वँशीरि म्यानि ज़ाग ह्यथ

बु ग्यवु नु अज़
बु ग्यवु नु नव बहारु बालु यारु के अमारु कुय रंगाबु रंग व्वज़ुल तु होर
न्यूल सब्ज तोत तु शोख नगमु कांह
बु ग्यवु नु अज़ सु नगमु कांह
ति क्याज़ि अज़, ति क्याज़ि अज़
बहारुसुय छि लार हर्द वावु के ज़हारुची
वनन अंदर अवारु ताज़ु शूविया छि नारुची
सखर छि आदुमस ति आदमी सुंदे शिकारुची
यँबुरज़लन तवय टॅपिस छि बनु गॉमुन्न
हवा छेनिथ प्योमुत, तु ही छी थरि बिचारि छ्यनु गँमुन्न

बु ग्यवु नु अज़
बु ग्यवु नु अज़ खाहन खलन तु डूरिनय
अंदर सु दांदु वॉल्य हॉल्य सुंद,
न्यंदन हुंदुय सु गुमु बँरिथ ति नगमु कांह
बु ग्यवु नु अज़ सु नगमु कांह
ति क्याज़ि अज़ तिक्याज़ि अज़
खाहन छु लावि न्याहलि लावि दावि जुव न्युमुत
खलन छु हालुवन हुंदे यिनुक ति पॉरु ज़न प्योमुत
ड्यकन प्यठुय छू खोफु सुत्य गुमु ज़न शिठिथ गोमुत
पला छु आवलुन च्वपॉर्य गथ करान
तु गासु तान्य क्रेट्यव, क्रेटिथ मूलु ज़न छु रथ हरान
बु ग्यवु नु अज़
तिक्याज़ि अज़ छि जंगबाज़ जालसाज़ होल गँडिथ

वॅंशीरि म्यानि ज़ाग ह्यथ

बु ग्यव नु अज़, बु ग्यव नु अज़
तोताम, योताम नु
कोह तु बाल, खाह तु डूर्य, गुल तु पोश, ज़ग तु प्रोन,
कुमिर तु कुकिलि बोल बोश, हरुद तु सौंत, वन तु बाग,
ज्वयि तु आब, ही ग्वलाब,
शालुमार, लालज़ार, आबशार, नव बहार,
जोजिबाल, बुरज़बाल, नंगुबाल, शीशिनाग, वावजन,
वारु कारु खोफु रोस्त, तु पॅहरु रोस्त तु अॅहरु रोस्त
बु बेयि वुछख
तु छिम्बरु मेलुवुन, सुली, सुली, सुली
इरादु म्यौन्य बेयि असन, लसन बसन
तु रथि खसन मुराद म्यौन्य
तु टोठ म्योन, नुंदबोन, बाग सोन, योहय पनुन पनुन वतन
यि बेयि वुछन
आबाद, आज़ाद तु ख्वश यिवुन, बहार ह्यु, तु लोव ल्वकृचार ह्यु

बु ग्यव तेली, बु ग्यव तेली
तु सौंतु फुलयि मोत गॅछिथ, बु ग्यव तेली
नतु तोताम ग्यव नु, ग्यव नु ज़ांह
सु नैदरि होत, खुमारु होत, बु सोज़ कांह
तवय बु नेरु, अज़ बु नेरु, वथ बु शेरु
बॅठ्य तु बेरु सॅम्य करख
बु नेरु तेज़ नौव कलम तु श्राख ह्यथ
तु दुशमनन तु रॅहज़नन बु नेरु फेरु ठाख ह्यथ
ड्वकुर कलम तु द्रोत ह्यथ, इरादु वोत प्रोत ह्यथ
बु फेरु जायि जायि शायि शायि पनुनि आयि
प्रथ बलायि द्रोत ह्यथ, ड्वकुर कलम तु द्रोत ह्यथ
रुमव रुमव बु गुमु वॅडिथ, छलन यि टोठ बाग सोन

यि नुंदबोन, बालयार, ल्वकृचार, चोन म्योन
तु खोह तु खयि, ख्वड तु लयि, बु नूर सुत्य पूरवख
बु ग्यवु नु अज़
बु नेरु अज़, ड्वकुर कलम तु श्राख ह्यथ
इरादु अख बे बाक ह्यथ।



मे छम आश पगहुच दीना नाथ नाँदिम

(१)

मे छम आश पगहुच । पगाह शोलि दुनियाह ॥

द्वहस गाश हुरि गुल तु गुलज़ार प्रज़लन
ज़मीनस सुसर लागि तु सबज़ार प्रज़लन ।
वछस मंज़ हुमिस लोलु फंवार प्रज़लन
पगाह शोलि दुनियाह ॥

कजुल लागुनय मे गछन अँछ कज़ौली
वस्यम दूद तु बबि टैड्य गछन मे व्वज़ौली ।
तु दहि वुहुर्य दशहार यियि सोन साँली
पगाह शोलि दुनियाह ॥

कनन गछि मे चां म्यां च़ल्यम वुय तु वायि
वछस तल मे च़ेह च़ेह कर्यम आयि ग्रायि ।
लबन लोसु कुठिसुय खस्यम मूलु मायि
पगाह शोलि दुनियाह ॥

हु बर च़ुरनि तँल्य कन थँविथ बोज़ि लोत लोत
तु थँज़ कौर थॉविथ सु बेयि नेरि पोत पोत ।
तु वनुवुन ह्यमस पोत्रु मॉलिस यि सोत सोत
पगाह शोलि दुनियाह ॥

यिनम सँदरु पनुन्यय वदव छय मुबारक
बु छस पोत्रु मॉज छँत्रु बून्य फिकरि तारख ।

ह्यमख क्वछि ह्यवन्य अज बू मा केह ति प्रारख
पगाह शोलि दुनियाह ।।

दपान जंग छु व्वथुवन, पगाह गोछ नु सपदुन ।
पगाह शोलि दुनियाह, पगाह गोछ नु सपदुन ।।

(२)

मे छम आश पगहुच । पगाह वादु छुम तस ।।

बू द्वह लोसुन्यन ह्यू थरन छायि प्रारस
तु हीमाल ज़न लोलु तय मायि प्रारस ।
गछ्यस च़ेर गम क्याह छु बे वायि प्रारस
पगाह वादु छुम तस ।।

सु यियि मायि मोत छायि होल ग्रायि मारान
बू आसय तैमिस मालि कित्य पोश च़ारान ।
कर्यम कथ बू रोशस तु छू लगी इशारन
पगाह वादु छुम तस ।।

स्यठाह ह्वंगनि रँट्यतन बू थवु कौर ब्वन कुन
तु येलि दँल्य रट्यम तेलि वुछस अदु अँछन कुन ।
रट्यम नालु अदु ओश दरुन मा छु मुमकिन
पगाह वादु छुम तस ।।

थैविथ कौर क्वछि मंज दिलुक्य दौँद्य बावस
तु र्वपु सीनु किय दाग नज़रानु थावस ।
प्रुछस बू च़े कवु लौँज्यथस लोलु दावस
पगाह वादु छुम तस ।।

वन्यम दूह छि नॅजदीख छोह मारि यावुन
छु नॅन्य पाँठ्य असि लोल हावुन तु बावुन ।
पॅत्युम पथ छु त्रावुन तु नोव नेछुनावुन
पगाह वाद् छुम तस ॥

दपान जंग छु व्वथुवुन, पगाह गोछ नु सापदुन ।
पगाह वाद् छुम तस, पगाह गोछ नु सपदुन ॥

(३)

मे छम आश पगहुच । शुर्यन मोल वात्यम ॥

युथुय बोज़ आलव, त्युथुय ब्रोंठु नेरस
रटन नालु मति ज़ोर, अँद्य अँद्य बु फेरस ।
नॅविस ताज़ु गासस प्यठुय जाय शेरस
शुर्यन मोल वात्यम ॥

थॅकिथ आसि आमुत, ग्वडॅन्य पाद नावस
तु म्वठ दोग दिवान वॅल्य वॅली नॅदुर पावस ।
तु नखु चिय गठुर ब्रोंह कनिय नज़रि थावस
शुर्यन मोल वात्यम ॥

गठुरि मंज़ नॅवी गुल तु गुलज़ार आसन
मे छिठ जानि कनु वाजि तूमर आसन ।
हॅबीबस खतनहॉज कित्य द्यार आसन
शुर्यन मोल वात्यम ॥

यिवुन्य ईज़ कित्य अँस्य पलव नॅव्य बनावव
तु कचि पूत्य जोराह ति क्वरबान थावव ।
हबस च़ाटुबाजन शिरीन्य बॉगुरावव

शुर्यन मोल वात्यम ॥

दपान जंग छु व्वथुवुन, पगाह गोछ नु सापदुन ।
शुर्यन मोल वात्यम, पगाह गोछ नु सपदुन ॥



ज़ून खँच़ च़ोट हिश दीना नाथ नाँदिम

द्वह अकि कोहु पँत्य ज़ून खँच़ च़ोट हिश
नालस छेनिमुच़ु तनि वछ़ु त्राँविथ
रवपु तनि हनि हनि दाग नँनिराँविथ
पनु पनु गॉमुच़ पोम्पूर्य पोट हिश
ज़ून खँच़ च़ोट हिश, थँच़मुच़ गोट हिश
ज़न मोज़ुरेनि कस ताम च़ँलुराँविथ
ठेक़ुदरन अँक्य थँव पुशिराँविथ
फुटुवॉटिस सृत्य रवपुयाह खोट हिश
ज़ून खँच़ च़ोट हिश, ब्वछि लँज बालन
ओबरन ह्यँच़ बेयि गँज छयवुरावन्य
वनु विगिन्यव प्योव ज़न व्वथु दानस
बतु कुल्य ज़न खँत्य संगरमालन
मे ति ह्यँच़ फाकु पँरिस शेछ बावन्य
अँछ फिर्य फिर्य वुछ मे ति असमानस



ल्वकृचि छु लखचुन दीना नाथ नाँदिम

ल्वकृचि छु लखचुन
बुमि हुंजि सुमि तल
सिरिं प्रज़लवुन
ज़न नाँग्यरायस
यारि अँकिस तल
मनक छु मोठमुत
बलुपूरिस छारान हीमाल
नतु आसमानस र्वनि दामानस
ओबुरस क्वछि क्यथ संगरमाल

ल्वकृचि छु लखचुन
हुंजि हुंजि लंजि प्यठ
म्वख्तु प्रज़लवुन
ज़न मजलूनस नजदु वनस मंज़
खाब छु आमुत
लॉल छि प्रारान ठरि दिथ बाल
नतु ज़न रॉच छु बुथि प्यठ तुलमुत
शबनम तथ छु बन्योमुत खाल

ल्वकृचि छु लखचुन
ड्यक कुय टिकु ज़न
ताफ प्रज़लवुन
संगल दीपुचि र्वनि पदमॉनी
प्रागाशन ड्यक म्यूठ छू द्युतमुत
नूर जहाना हूर मिसाल

नतु ज़न हरनन क्वलु सरस कुन
वनु प्यठु नीमुच्च छ्यफ दिथ छाल

ल्वकचि छु लखचुन
अथ छुनु म्वलुवुन
लाल प्रज़लवुन
गुलि लालस ज़न
छ्वकुलद वछुकुय
दाग व्वजुम ह्योत
दकुलद ज़ूनि
गाशस गटु हिश नॉली नाल
नतु शफकन वॉर शामुचि छायि
कपटिथ पॅतर्यन बिंदर्यन माल

ल्वकचि छु लखचुन
हंगु तलुकनि कुय
दूर प्रज़लवुन
हरम्वख्रु प्यठुची
प्रेन्य शीनुमाने
वुज़मलि ज़न वुन्य
बोसु छु कोरमुत
बौबुरस प्रारान स्वंदरमाल
नतु ज़न वनु सुय मंज़ सीताये
अॅश डल आमुत मालामाल

ल्वकचि छु लखचुन
शाह रगि ह्योर कुन
लोल प्रज़लवुन
ज़न देदि म्याने
वछु तलु रोछमुत
म्वनि फोल अॅछ हुंद
छेनि मोहबतु सत्य ओनमुत माल
नतु अकि गॅर्यबौनि कनु मंज़ च़ॉरिथ

फलल फलल तुजमुच्च लेजल कलचु चल ।



गुलि लालु अमीन काँमिल

गुलि लालु फोलिथ आय वनन मंज़ तु डलन मंज़
प्यव शोहरु च्चवापौर्य यि बागन तु खलन मंज़
कुमिरन तु जलन मंज़

कोर ज़ूल यि ज़न मागु बँचिथ सोंतु बहारन
द्युत आशकव रंग यावनुक ज़न लोलु अमारन
बेताब इशारन

गुलि लालु ज़न मस प्यालु बँरिथ थोवमुत कलुवाँल्य
या ग्रीस्य कँटाह लोछ व्वज़ुल नार छुनिथ नाँल्य
या शोलुवन्य मशॉल्य

ज़न डूल्य आमुच कोरि माँलिस कहारनुय हुँदि दँस्य
या टोपि हन वति प्यठ व्वज़ुज पेमुच छि शुरिस वँस्य
वातुन्य यि गँछ बेयि तँस्य

चथ जामि शहादत छु ज़न शरवाँन्य सु वलुवीर
हँज्यानि वुछिथ अंज़िनि होंटा ज़न छु रसुल मीर
पुर जोश दुआगीर

ज़न माहरेन्या व्वशलेमचुय डीशिथ पनुन खावंद
या बाँज्यगारन नारु रेह वँरमुच छि नज़रबंद
या लालि समरकंद
ज़न कार्तिकुची ज़ूनि बुथिस प्यठ छु सियाह खाल



शब गर्द वासुदेव रेह

माने बूज़िव यिमन कलामन होशा होश
आलव म्योन यि शामन शामन होशा होश
दाय मे यी द्युन खासन आमन होशा होश
आलव म्योन यि शामन शामन होशा होश

हे वुछ साँ म्यॉन्य बेदौरी आँखुर मा त्वहि तार दियव
पथ ब्रोंह वुछिनय नैदुर अगर त्रॉविव थपलिस मा आर यियव
वुमरि सौंबरोवमुत राविवु रछ खंड काँसि अगर व्यस्तार यियव
हे वुनि मा छि वॅमी बदनामन होशा होश
आलव म्योन यि शामन शामन होशा होश

म्योन सदा गव खॉलिस बायव होश हबा हुशयार हबा
यथ समसारस नाहमवारस चारु दिनस छुनु तार हबा
क्याज़ि रछुन आराम छु तवु किन्य आरामस छुनु वार हबा
युथ नु ह्यमॅन्न हुंद त्रॉविव दामन होशा होश
आलव म्योन यि शामन शामन होशा होश

यिनु साँ आलव म्योन गछिवु वॅन्य पॅत्य तु यि बूज़िथ मॅशिरॉविव
यिनु पनुन अँज्युक या पगहुक सौंचुन बेयिनुय प्यठ त्रॉविव
यिनु सॅन्य चूरस दीनस दर्मस द्रियन तु कसमन कन थॉविव
म्वखसर थँविज़ि नज़र अंजामन होशा होश
आलव म्योन यि शामन शामन होशा होश

यिनु कनु दोल दियिव क्रख बूज़िथ राय गछ्यव असि क्या साँ हे
यिनु ज़ॉनिव यि छु पर आलव अँस्य पान रछव असि क्या साँ हे
यामथ कांह गछि नाराह दिथ, यिनु त्वहि बास्यव असि क्या साँ हे
म्यॉन्य यॅहय क्रख शाहरन गामन होशा होश

आलव म्योन यि शामन शामन होशा होश

ज़रि हना वख कूठ हसॉ वुछ सॉ तामथ क्याह करि इनसान
वुछ सॉ यी मा रोज़ि द्वहय यि छु दौराह अथ क्याह करि इनसान
थफ थवस हेयि पथ पानय सौत सौत, न्यथ रोज़्या कथ, क्याह करि इनसान
बायव होश यिमन अयामन होशा होश
आलव म्योन यि शामन शामन होशा होश

बाहरॉल ती शुर्य ह्वकु ची ची यिनु यारो मिसमार गछिवु
नालु रँट्चून यि योवुन, वख यिनु अथु मंज़ु राविवु, फ्यार गछिवु
सर्फ़स बीन गछिवु यिनु पर क्रख, नाहकु युथ नु करार गछिवु
यिनु रेह ज़ालिवु माहरेन्य खाबन होशा होश
आलव म्योन यि शामन शामन होशा होश



जाय कत्यो छय

वहाब खार

छम चॉन्य स्यठाह माय मत्यो
जाय कत्यो छय
दूरन च्रु मो मार ग्राय मत्यो
जाय कत्यो छय

येति ना दरनपाय मत्यो
सरन सब्जी छय
काच्रु जूनि कासतम ग्राय मत्यो
जाय कत्यो छय

ड्यकस मंज छय जाय मत्यो
स्वय मे लेखनय छय
तिम छी हरफ डाय मत्यो
जाय कत्यो छय

ग्वनाह तु सवाब आय मत्यो
त्रकरि तोल्यम दय
तथ कोरकुन लागि ग्राय मत्यो
जाय कत्यो छय

कम कम सुलैमान आय मत्यो
कति हातिम तय
दोराह वॅरिथ द्राय मत्यो
जाय कत्यो छय

यिम येमि बवुसरु द्राय मत्यो
तिम नु फीरिथ आय
अब्दुल वहाबस राय मत्यो
जाय कत्यो छय



वलु गूर करॉयो

वाज़ महमूद

हा जानि अँज़ीज़ो, वलु गूर करॉयो
मति लाल ज़रॉयो, वलु गूर करॉयो
पनुन्यव तु परायव, दोस्तव तु रँफीकव
बनुनस ति ग्यूलहमो, वलु गूर करॉयो
मजनून खोत नजदस, लॉल च़ायि मज़ारस
लॉलि हुंदि मजनूनो, वलु गूर करॉयो
थरि हुंदि ग्वलाबो, कथ वारि फोलुहमो
मुश्कि चानि बलॉयो, वलु गूर करॉयो
हा म्यानि अज़ॉलो, वनुयो बु गज़ॉलो
जामु गव मे कज़ॉलो, वलु गूर करॉयो
रवपु रवनि अंज़ोलुय, श्वनि दार मंज़ोलुय
चंद्रनुक बु गरॉयो, वलु गूर करॉयो
कस वनु यि क्याह गोम, हियु यावनस डोठ प्योम
ती ना बु ज़रॉयो, वलु गूर करॉयो
आम अँशुकुन दूलाब, सँर्य पेठ्य गोम सँहलाब
कमि तारु तरॉयो, वलु गूर करॉयो
सोदा मे कर्यामो, मूलस ति छ्वन्यामो
तूलस बु क्या दिमुयो, वलु गूर करॉयो
शाहबाज़ अयाज़ो, वन महमुद्य वाज़ो
शाहनामु परॉयो, वलु गूर करॉयो

★ ★ ★ ★ ★

गज़ल

वाज़ महमूद

खबर क्याह मे ऑसुम सु दिलदार रावे
वॅरिथ खश मे थावे सु बे आर त्रावे
स्यठाह काल वोतुम करान इन्तिज़ॉरी
सु अज़ पगाह वाति तय हाल बावे
बदल तथ मे द्युतनम, दगा त्युथ मे कोरनम
यि ल्वकृचार म्योनुय वॅरिथ गव सु ज़ाये
मे छिम दादि तॅहुंदे व्वथान क्रॉर्य ज़ख्मन
बलन दॉद्य सॉरी सु लरि पान सावे
बु देवानु कोरमुत तॅहुंद्य हुस्ने नाज़न
ओडुय रोय हॉविथ थवन क्याज़ि छाये
य्वहय छुम दिलस मंज़ तमन्ना मे चोनुय
यिमन दीदनुय मंज़ करस ना बु जाये
छु महमूद गोलमुत दर फिकरि दिलबर
ललवान दिलस मंज़ ज़न तिलु क्राये



शखदारी लाल लक्ष्मन

बॉश दूह बरनि प्यठु बेयि बटुवारे
लालु लक्ष्मन शखदारे द्राव
थाल तय बोहगुन तुलुन अटुबारे
लालु लक्ष्मन शखदारे द्राव

ग्रहदिस तु ग्रहचारस गॅयि मिलवन
सतरंजि फरदाह गिलवन द्राव
होछिमुच्च गुर्य खॅट ऑसुस सवारे
लालु लक्ष्मन शखदारे द्राव

दूह अकि लालु जू फोट अँकिस गमनस
दाह मोहनिव्य तस लमुनस लॅग्य
दरु दरु दीवान वर लोगुस कारे
लालु लक्ष्मन शखदारे द्राव

दूह अकि काकस आफताब रामस
बागवथ वोनुमस शामस ताम
द्यव दियि बतु म्योड यियि व्यचारे
लालु लक्ष्मन शखदारे द्राव

शामन वोनुनम वॉराग ओनुथम
बतु मैडि बापथ वोनुथम वीद
अँस्य न साँ ज़ानोय यिमु ज़ासकारे
लालु लक्ष्मन शखदारे द्राव

बुडाह अख ऑसुय आमुन्न तु गॉमुन्न
मरनु दादि ऑसुय दूदरेमुन्न
क्रोछ ह्यथ आयम चोकु मंजु लारे
लालु लॅक्षमन शखदारे द्राव



बाकयात

लाल लॅक्षमन

वनय बोज़ ताज़ अहवाल, ज़मानुक हाल वैसिये
अन्यन आर्डर छु परनस, मुलाखत कॉन्य करनस
ज़र्यन बोज़ुन छु पॅरियाद, यि बेदाद बोज़ वैसिये

★ ★ ★

खॅरीदारस द्रवजर मार, व्वजुम वॉनिस करन खार
अयाल बारस समावार, करन लाचार वैसिये

★ ★ ★ ★ ★

गाडु घगुल लाल लक्ष्मन

दपन अख खानुदाराह दारि प्यठ ओस
करन आशेनि कुन तकसीर सुय ओस
छि ज़ँन्य जोराह खबर सोनुय पकन मा
दु शरतस प्यठ खबर छा येत्य ड्वकन मा
बरन राथाह करन च़ुंठाह तु च़ासाह
वुरुन वथरुन मंगन त्रावन लम्बासाह
सलाह छुम यी प्यवन व्यवहार त्यागुन
कलस लेफाह वलुन्य, बेमार लागुन

वैछुस आशेन्य च़ु छुख देवानु गोमुत
रोटुख मा हुर्य यछन, ज़न छुख मत्योमुत
रनन वाजेन्य बु छस बुय लागु बेमार
च़ु बेह रूशिथ मे कुन कर ज़ार तय पार
वनुन यी गछि मे कोताह खोत यि इलज़ाम
मे खँड्य फुट्य कर्म कौत्याह ऑस्य अज़ ताम
हतय थोद व्वथ दोदुस चाने फिराकय
कैरिथ दिम कोम च़ोटाह, मूदुस बु फाकय
लदुन सूराह वदुन गछि बाकि सुती
शुर्यन अपजुय जिगर छ्योन फाक सुती
यि कथ यामथ पछ्यन वाती कनस मंज़
दपन येति नेरुवय, सोंचन मनस मंज़

यँहय कथ पास गँयि, म्यंगन द्युतुन चार
हेच़न लेफाह वुरुन्य तमि लोग बेमार
वुछिव प्रालब योतामथ शाम सपनुन
नँसीबन लॉग्य तिहँदिस आंगुनस कुन
कैरुख क्रख खानुदारव स्वर्ग नीतव

मुसॉफिर आयि रातस जाय दीतव

सदा बूज़िथ कनन गव खानुदारस
दिचुन क्रख वोथ बे बूजाह यथ शहारस
मरन छम खानुदारेन्य, खानु वॉरान
पकन गुर्य हिव्य गॅमुत्य छिवु हालि हॉरान
बुछिव तॉजिब कथाह अॅल्य अॅल्य छि खॅत्यमुत्य
पखर पोरिक्य हखर ज़न नीरि वॅथ्युत्य
शॉगुन आसुन छु येति फ्युरुन पछ्यन डाख
मुदथ गोमुत छु ब्राद्योमुत बिदथ ब्याख
ग्वडुन्य ऑबाह गरस सॉनिस दरीं वख
बॅदुर नूजाह छे चमरेमुन्न स्यठाह सख
बुथिस नॅहवन छे नस मारन छे तछ तछ
नॅदुर यामथ प्यवन, व्वपुरस कडन अॅछ
गगर ज़ाथाह नवेमुन्न यथ इहातस
स्यठाह सख्ती अनन तिम रॉत्य रातस
व्वपर डींशिथ गछन गगरन सितेज़य
व्वपर पलवस करन तिम रेज़ रेज़य
पगाह ऑसिव खरस खारन, वनन दॉद्य
अखाह आस्यम मे फॉसुल्य, ब्याख फॉरियोद्य
गॅछिव बायव वॅरिव बरदाश खॉरी
सफॉयी जान गॅयि अज़ खर सवॉरी

ति बूज़िथ गुल्य गॅडिथ वोन खानुदारस
सपुन ख्वफतन, ज़रा सा गछ व्यचारस
करव अॅस्य चारु त्रौपुरावव गगर वाल
गगर छल ह्यथ छि ब्वखचस क्यथ, मु दुन ज़ाल
वनय कोताह महातम मागु मासुक
गॅरीबन प्यठ योहय छुय डाडु पासुक
च़े क्याह छुय राह वोलुख पापव च़ु सान्यव
खबर छय ना यि क्याह वोनमुत छु प्रान्यव

अगर कांह चुनि बोकाह अज़ दिये दानस
बु छुस ज़ानन ज़ि तस खारन व्यमानस

ति बूज़िथ खानुदारस वोथ दिलस ताव
दिचुन अदु कूठराह अख, आर तस आव
शिकस कूठर बँरिथ वुछ सूर सासय
ज़ु गज़ खँत्यमुत्य तथ अंदर लछ तु गासय
थँविख बर दिथ तथ अंदर, ऑस्य दर्द मंद
थँविख पँश हिव्य वँरिथ गानस अंदर बंद

मे वँर काँमाह तिहिँदि करतूतची व्वन्य
वुछुम पाँपी अँछव बरुचव लुयव किन्य
पेमुच्र गॉमुच्र बटन्य वँछ, होल गौडुन सख
दोपुन रुनिस चु थोद व्वथ, चेर गव वख
तुजिन मलराह तु पानस द्रायि लारान
वनस मंज़ रूस्य वँट ज़न छालु मारान
तँलिन गाडस त्रे मन म्वकल्योस माँलाह
छँलिन तोमलस त्रे मन अज़ जिन्सि ऑलाह
दोपुन ज़ांह यिछ ज़ियाफत छम नु रँनिमुच्र
अजायिब गाडु ज़ाथाह अज़ छे अँनिमुच्र
तम्बुरि हुँदुय च्वक्यर लागख फिरख डाख
बगारुक रस करख रातस दिमख पाख
रँनिथ क्याह काँम वँर तँम्य खानु दारन
फिरिन नैर्य गव सु पानय छालु मारन
वँरिन तथ बाँटु प्रथ बाँचस कमो पेश
ख्यमव पांचन दूहन तामथ करव ऑश

वोथुख ज़्युठ ह्यू, वँडिन ज़ेवि दँह पंदाह टास
थँदी छिस मर्चवांगन, छम यिवन च़ास

मगर बूजुम यिमय गॅयि मर्चवांगन
वसुन गछि प्युंघ, दगि व्वज़लन्य गछन कन
कथाह बाथाह कॅरिथ ख्यथ चथ खोतुख कॉफ
दोपुख त्रावव नैदुर प्यठ कुन ह्यमव लेफ

मे कोड आलव तिमन तोहि क्युत छु दरजाथ
श्वंगव ना अँथ्य वोटिस अंदर कडव राथ
यि कथ बूज़िथ तिमव पँहरा सलाह कोर
दोपुख अदु क्याह वॅलिव, बेहतर स्यठाह चोर
योतामथ शुर्य तु बँड्य तिम द्रायि पानय
सपुन्य सॉरी कुठ्यन अंदर रवानय
योतामथ तिम सपुन्य परि लूकु वॉसी
तोतामथ अँस्य ति अपज़े नैदरि ऑसी
शिकस कुठरे अँदुर नेरुन सलाह ज़ोन
टुख्रय अँन्य, अँथ्य कुठिस अंदर कदम चोन
चोलुम ग्रहचार फ्यूरुम फ्रूस ताले
वुछुम क्याह गाडु द्यगुलाह पुर मताले
वुछुम बतु दीचि रोनुमुत ज़न छु कोफूर
फ्यूरुम ब्वखचस तु दीचस थोवमख सूर
न्यबर नीरिथ दोपुम दोयिमिस ह्यसस फेर
यि तुल पँत्य किन्य, टुख्रय तुल, व्वथ च़लव नेर

दुपहर यामथ सपुन द्यगुलिस मुचुर गोल
वनय क्याह गाडु ख्यथ कोताह जिगर फोल
नज़र दिच़ वुछ बटाह लारन तु थारन
द्यकस प्यठ च़ंजि लायन पान मारन
अँछव किन्य खून हारन कमि हालय
तमाँमी दॉर खुंज़मुच़ वालु वालय
दिच़न क्रख रँहज़नव तोह्य छिवु बे परवाय
धर्म ज़्यूनम पछ़्यन रातस दिच़म जाय
वुछिव बा हे यिमन कर ज़ांह ति पूरे
ख्वदायाह गाडु द्यगलुय न्यूख च़ूरे

नेदरि वैथिथुय बु यामथ च्नास लंगरखान
वुछुम तति सूर सासय, ज़न गोमुत फान
यि बूज़िथ रोट पछ्यव, कोरुहस मुकालय
सु खर लोट दॉर खंज़ुहस वालु वालय



वलो म्यानि पोशे मदनो

हब्ब खोतून

दिल निथ रँटिथम गोशे ।
वलो म्यानि पोशे मदनो ॥

वलु वेस्य गछवय हंदे
लान्युन न्याय कति अंदे ।
लुकु मँत्य वँडनस रंदे
वलो म्यानि पोशे मदनो ॥

वलु वेस्य गछवय बबरे
छवख मे लोयिनम तबरे ।
कांछा सूजनम नु खबरे
वलो म्यानि पोशे मदनो ॥

वलु वेस्य गछवय शॉद्य पोर
वायिनि त्रावस हाँज चोर ।
सेँदि वानि छलुसय अथु खोर
वलो म्यानि पोशे मदनो ॥

वलु वेस्य गछवय हिये
युस मरि सु कति यिये ।
प्रारान छस बु चानि जिये
वलो म्यानि पोशे मदनो ॥

वलु वेस्य गछवय आबस
दुनिया छु नैदरि तु खाबस ।

प्रारान छसयो जवाबस
वलो म्यानि पोशे मदनो ।।

वलु वेस्य गछवय क्रैछे
लुकु मँत्य तुजनस रेछे ।
तिमन ते म्योन ह्यू गछे
वलो म्यानि पोशे मदनो ।।

वलु वेस्य गछवय वन तय
लूकव बँर्यहस कन तय ।
ती बूज़ तँम्य सादन तय
वलो म्यानि पोशे मदनो ।।

वलु वेस्य वसुवय ब्वन तय
कनु कुय दिमसय स्वन तय ।
स्वन म्योन दून मोहरन तय
वलो म्यानि पोशे मदनो ।।

वलु अज़ दुय त्राव म्याँनी
छम मनु कामन चाँनी ।
ऑखुर छु दुनिया फाँनी
वलो म्यानि पोशे मदनो ।।

अफताब छारान ज़ूने
लान्यन छु वालान वोने ।
वोन इशारा हब्बु खोतूने
वलो म्यानि पोशे मदनो ।।

★ ★ ★ ★ ★

गाह चोन प्यवान गटि

हब्बा खोतून

गाह चोन प्यवान गटि । अकि लटि यिहम ना ॥

यावन म्यानि किरमिज़ पटि, कम्पू वानु रंगनय आख ।
मे नो ज़ोन अँथुर च़टि, अकि लटि यिहम ना ॥

आबस बो वँछूस गटि, नोट मोटुमो यारुबल ।
विज़रु वावु नोट मा फटि, अकि लटि यिहम ना ॥

हूर लॉल द्रायस गटि, चूर बाय प्योमो नाव ।
स्वनु कन तु लँदरु हटि, अकि लटि यिहम ना ॥

यार म्योन छु जमालटि, कमाल तस छुम नाव ।
सु छुम तति बु कस मटि, अकि लटि यिहम ना ॥

यारज़ येलि यारज़ च़टि, मोहबत नु रोज़ान सोर ।
यारु दादि वॉलिंज फटि, अकि लटि यिहम ना ॥



काँसि मो रॉविन शूरे पान

हब्बा खोतून

तुलुव नार छुम ललुवुन मूरे ।
काँसि मो रॉविन शूरे पान ॥

मॉल्य माजि रॅछनस कंदु कोस्तूरे
द्वदु सुत्य ऑसिम तन नावान ।
सुय पान लोगमाह रह मुसाफूरे
काँसि मो रॉविन शूरे पान ॥

मॉल्य माजि रॅछनस लोलु क्या वूरे
सासु बजु च्वंजु आसम सुलवान ।
मे नो ज्ञान्योव लगु येमि खूरे
काँसि मो रॉविन शूरे पान ॥

मॉल्य माजि त्रॉवनस सबकस दूरे
औखुनन वोलुनम मूरे पान ।
आरु रोस्य तुलिनम नारु त्यम्बूरे
काँसि मो रॉविन शूरे पान ॥

मॉल्य माजि हरशायस येलि दूरे
पतु पतु द्रायम व्यसु वनवान ।
होलु गोम अँदरी लोलु तालूरे
काँसि मो रॉविन शूरे पान ॥

मॉल्य माजि वोनूनम ड्यकु बॅड कूरे
वॉरिव आंगनु छिय प्रारान ।

रंगु डोलि आसम र्वपु कौदूरे
काँसि मो राँविन शूरे पान।।

बु छसय येति तय च्चु छहम दूरे
द्वशवय द्राये जाँनी जान।
मे नो ज्ञान्योव लोदमुत लूरे
काँसि मो राँविन शूरे पान।।

दय नय दियि तय ड्यकु नय पूरे
वयमुच आस्या काँसि पोशान।
म्वय चव हबु खोतूनि टूरि टूरे
काँसि मो राँविन शूरे पान।।



वॉरिव्यन सुत्य वारु छस नो हब्बा खोतून

वॉरिव्यन सुत्य वारु छस नो ।
चारु कर म्योन मालिन्यो हो ॥

गरि बु द्रायस आबु नॅटिस
नोट मे फुटमो मालिन्यो हो ।
या तु दीतव नटि नोटाह
नतु नटिचे हारु मालिन्यो ॥

शुर्य पानस सिंदर गॅयिमो
वुडुर खसुन कुडुर प्योम ।
कतुर छारान कतुर सॅनिमो
वेतरि नून प्योम मालिन्यो हो ॥

हशि लॉयिनम टॅपिसुय थफ
सुय मे गोमो मोतु खोतु सख ।
यँदरु पचि प्यठ नैदर पेयिमो
चॅषुर फुटमो मालिन्यो हो ॥

यारु दादे तारु गॅयिसो
बारु बुख छुम आमतुय ।
हबु खोतूनि वोन इशारा
दिल हुशारा मालिन्यो हो ॥



छाव म्यॉन्य दॉनय पोश

हब्बा खोतून

मे वॅर्य च़ेय कित्य पोशि दसवानय ।
छाव म्यॉन्य दॉनय पोश ॥

बु छसय ज़मीन तय, च़ु छुख असमानय
सीरस छुख सरपोश ।
बु छसय न्यामथ, च़ु छुख मेज़मानय
छाव म्यॉन्य दॉनय पोश ॥

लॉले गटि मंज़ च़ोंग ज़ाजानय
बाले रूदुस नु होश ।
च़ु छुहम शमा, बु छस परवानय
छाव म्यॉन्य दॉनय पोश ॥

रछि रछि रयतकोल छुम सोरानय
बरु मा गछन अछि पोश ।
कुनि हीतु बुलबुलु यितु अकि आनय
छाव म्यॉन्य दॉनय पोश ॥

बॅरगु तीर ऑसुस प्यठ दरीचि खानय
रूदुम ति ना ज़र जोश ।
अदु यिख येलि बाल सोर पानु हानय
छाव म्यॉन्य दॉनय पोश ॥

बम तय ज़िलु छिस सोज़ वायानय
विलुनुय थोवथम नु गोश ।

कम क्या गोयो येमि म्यानि वानय
छाव म्याँन्य दौनय पोश ॥

रंगु रंगु थुर्य अम्य क्रालन बानय
ब्योन ब्योन कोरनख नकूश ।
कैह द्रायि हँल्य वँल्य, कैह जानानय
छाव म्याँन्य दौनय पोश ॥

चौरिथ अँनिमय फंबु मोयानय
जानानु मे मो रोश ।
हबु खोतूनि रूदुम अरमानय
छाव म्याँन्य दौनय पोश ॥



चे क्योहो गॅयी म्यॉन्य द्य हब्बा खोतून

चु कम्मू स्वनि म्यानि ब्रम दिथ न्यूनखो
चे क्योहो गॅयी म्यॉन्य द्य।
चख त्राव द्य मलालु व्वंदु छुय ना यिवान
चे क्योहो गॅयी म्यॉन्य द्य॥

न्यस्फ रातन बर वॅथ्य त्रॉविमय
साथा यिख ना चुय।
फेरु छुनु कैह ति फेर छुख पावान
चे क्योहो गॅयी म्यॉन्य द्य॥

मदन वारो बदन ज़ोलथम
गोछुहम मै आदन चुय।
बादाम चेश्मव खून छसया हारान
चे क्योहो गॅयी म्यॉन्य द्य॥

श्रावुन शीन ज़न बु गलान आयस
बागस फोजिस बु ही।
चोनुय बाग तय चुय वलो छावान
चे क्योहो गॅयी म्यॉन्य द्य॥

ज्वलु छम ना यिवान म्वलु छुख वालान
गम छुम वॉलिंजि सुय।
ज़ांह छुख नु दोदमुत सीनु शेहलावान
चे क्योहो गॅयी म्यॉन्य द्य॥

छारान लूसस कोहन तु बालन
सोरान आम बालि घन ।
राह क्याह लोदथम कोनु छिहम माज़ान
चे क्योहो गँयी म्यॉन्य दय ॥

तन छस नावान जामु छस पॉरान
हावान छसया चॉन्य द्रय ।
पनुनिस पानस ग्रायि छुखा मारान
चे क्योहो गँयी म्यॉन्य दय ॥

ओश छस त्रावान बु च़ालि च़ाले
मे बालि गोछुहम च़य ।
च़ु कवो वति म्यानि आख मँशरावान
चे क्योहो गँयी म्यॉन्य दय ॥

हबु खोतून छय अरमान ख्यवान
वैरमय नु ज़ांह बंदुगी ।
यावुन रोवमुत छुम याद यिवान
चे क्योहो गँयी म्यॉन्य दय ॥



पोशे मति जानानो

महजूर

चोलहमा रोशे रोशे । पोशे मति जानानो ॥

अँती अँती रोजतो यारो, कोत चोलुख जोदूगारो ।
ग्वडु कर म्योनुय चारो, पोशे मति जानानो ॥

बुछमखा दूरे दूरे, सनु गोम स्वर्गुचि हूरे ।
छस वदान चूरे चूरे, पोशे मति जानानो ॥

बाल प्यठ बाल छस प्रारान, अशि कनि खून छस हारान ।
यारस मार मटि खारान, पोशे मति जानानो ॥

अँशकन वँरुस बदनामो, क्रख गँयि शहरु तु गामो ।
पितरेन्य छम दिवान पामो, पोशे मति जानानो ॥

छस वदान पँत्यमे प्यारे, मारुँत्य दिल कोरुम तारे ।
तोति मे रूदुम हारे, पोशे मति जानानो ॥

वलु वेस्य गछुवय कामे, यॉर्य हय वँरनस थामे ।
गॉजिनस तु लॉजिनस पामे, पोशे मति जानानो ॥

वलु वेस्य गछुवय वन तय, तस वँम्य बँरिनम कन तय ।
कर सना बेयि डेशन तय, पोशे मति जानानो ॥

यिखना हालि दिल बावय, दोदुमुत सीनु हा हावय ।
तेलि यिखा येलि बो रावय, पोशे मति जानानो ॥

कसू निशि शेछ बो थावय, कसू अथि सोज़य ग्रावय ।
रोशि यितु पोश वथुरावय, पोशे मति जानानो ॥

असुवुनि हा ख्वशबाशे, लॉजिथस कथू वालु वाशे ।
वॉलिंजि करिथम काशे, पोशे मति जानानो ॥

च़ोलुहमा रोगे रोगे, सँन्यास लागय जूगे ।
मॉरुस हा बु चानि होगे, पोशे मति जानानो ॥

बालु प्यठु लायै नादो, पथ फेर हा शहज़ादो ।
मो च़ल, ग्वडु पाल वादो, पोशे मति जानानो ॥

लीख्य लीख्य ग्रावु हा सोज़य, हा बु नो यिम बहानु बोज़य ।
दावागीर हा रोज़य, पोशे मति जानानो ॥

अजि रॉच़ बु गरि द्रायस, वनुवुनि नॉगी रायस ।
लॉन्य ज़ालु वलनय आयस, पोशे मति जानानो ॥

वति प्यठ च़ोलुहम त्रॉविथ, जिगरस आमुताव थॉविथ ।
यिम दॉद्य कसू ह्यकु हॉविथ, पोशे मति जानानो ॥

ऑसुस नैदरे हँच़ुय, वॉच़ुस चानि खँदमँच़ुय ।
लोलु चानि राव्यम रॉच़ुय, पोशे मति जानानो ॥

शर हो च़लिहेम पानस, बेहतो डबि डालानस ।
लगुयो सौरि सामानस, पोशे मति जानानो ॥

महजूर वॅन्य दिवान यारस, बे वफा बॉज़ीगारस ।
दॅप्यतोस कूत काल प्रारस, पोशे मति जानानो ।।



जलवु हॉविथ च़ोलुहमो

महज़ूर

जलवु हॉविथ दूर त्रॉविथ तंबुलॉविथ च़ोलुहमो ।
आरु रस्तिे यारु लगयो खार थॉविथ च़ोलुहमो ॥

चाख म्यॉनिस लोलु बागस द्राख ताराजा वॅरिथ ।
होश न्यूथम रोशि रोशे, पोश छॉविथ च़ोलुहमो ॥

कौलु रस्तियो दोलु वुछनन चॉन्य कोरनम होल मे ।
सतु वॅरिशे लोलु वॉलिंज कतुरॉविथ च़ोलुहमो ॥

सादु ऑसुस वादु ह्यथ मे उलफतुक सोदा कोरुम ।
रॉज्य थॉविथ बॉज्य ख्यॉविथ गाटु पॉविथ च़ोलुहमो ॥

मानुरेन्य ऑसुस तवय बो लूकु पामन लॉजिथस ।
मंदुछॉविथ अंद त्रॉविथ, पामु थॉविथ च़ोलुहमो ॥

कीनु रोटुथम सीनु च़ोटुथम, रोय खोटुथम हॉच़लो ।
छँदुरॉविथ तश्नु थॉविथ पशिनाँविथ च़ोलुहमो ॥

कामु दीवो नामु सूज़िथ पामु लेछितम तथ अंदर ।
हाय पनुने दस्तु मोतुन प्यालु चॉविथ च़ोलुहमो ॥

हियु थॅर ज़न बरु वॅरथस लोलु नारु ज़ॉजिथस ।
सोसुनाँविथ अंद मज़ारस वातुनाँविथ च़ोलुहमो ॥

दूर प्योमुत चूरि ज़न महज़ूर तस यारस वनान ।
टाठि यारु आदनुक स्नेह मँशरॉविथ च़ोलुहमो ॥



गँजिस चाने कले बोम्बुरो

महजूर

तमन्ना चानि दीदारुक, मे छुम यँम्बुजले बोम्बुरो ।
फोजिस यामथ लँजिस वुछने, गँजिस चाने कले बोम्बुरो ॥

यि कद चोन ज़न छु पोशे कुल, फुलय बरजस्तु छस बिलकुल ।
वुछिथ संबुल तु रँगीन गुल, यि दिल मा तम्बुले बोम्बुरो ॥

वुछुख दूरे मे मस्तूरे, दिलुक स्नेह मे थोवुम चूरे ।
त्रे लोयुथ तीर ज़न हूरे, यि छ्वख नो ज़ांह च़ले बोम्बुरो ॥

खँटिथ रूदुख मदनवारय, बदन मे ज़ोलुथम नारय ।
वदन छस चानि अमारय, यि दिल कर शेहले बोम्बुरो ॥

च़ु यारन सुत्य छोह मारान, बु तन्हा खूने दिल हारान ।
द्वहस कोत नेरु छस थारान, व्वं छांडथ रोटुले बोम्बुरो ॥

त्रे कस सुती गँयी सॉज़िश, दोयिम छा ब्याख कांह मे हिश ।
च़ु म्याने रश्कु पानस निश, रोटुख कमि मसवले बोम्बुरो ॥

यिहम ना हाले दिल बावय, गछि कुठि तोसु वथरावय ।
पनुन जुव पेशकश थावय, मे पानस शर च़ले बोम्बुरो ॥

यि पर मस यारु वँम्य चोवुख, च़ु गॉरन सुत्य मिलुनोवुख ।
वँरिथ तॉवीज़ ब्रमुरोवुख, कम्यू आरुवले बोम्बुरो ॥

करान महजूर हुस्नस गथ, वनान यारस पतव अख कथ ।
यि दिल देवानु गव च़ेय पथ, बेयिस सुत्य नो रले बोम्बुरो ॥



रोज़ू रोज़ू बोज़ू म्यॉन्य

महजूर

रोज़ू रोज़ू बोज़ू म्यॉन्य ज़ार मदनो ।
लोलु चानि छसया बेमार मदनो ॥

काचु जून गॉजिथस, सफरस लॉजिथस ।
छोरुमख गामु शहार मदनो ॥

यारु दोद कूठ प्योम, शुर्य पान ज़ायि गोम ।
चे पतु रोवुम ल्वकचार मदनो ॥

बागुच यँबुरज़ल, दॉन पोश तु मसवल ।
पादन करय निसार मदनो ॥

इशारु हावान, दिल कतुरावान ।
बुमु चानि नाज़ु तलवार मदनो ॥

चुय म्योन गमखार, चुय म्योन सितमगार ।
चुय छ्वख तु चुय हा बुलगार मदनो ॥

खून गोम जॉरी, ओश हॉर्य हॉरी ।
फलि फलि गोम म्वख्तु हार मदनो ॥

नज़रे चानि सुत्य, बेमार बलेयि कुत्य ।
म्यानि विज़ि लोगुथ बे आर मदनो ॥

चेश्म चानि मस खॉस्य, डीशिथ गॅय वुदॉस्य ।
बंगॉल्य जोदूगार मदनो ॥

वनिहे महजूर दास्ताने दिल ज़रूर ।
वनुनस छुय नु तस वार मदनो ॥



वेसिये सु म्योन दिलबर

महजूर

वेसिये सु म्योन दिलबर, शीरीं कलाम यियि कर ।
यस कुन वुछिथ च़लान शर, सुय गुल अंदाम यियि कर ॥
यियि ना सु यार म्योनुय, च़लिहे मे ज़ून ग्रोनुय ।
वंदस वेंबील क्रोनुय, रोज़स ग्वलाम यियि कर ॥

कति लोग करार यारस, कर यियि सु यथ शहारस ।
रोज़स बु इन्तिज़ारस, सोज़स सलाम यियि कर ॥

ब्रम दिथ च़ेलुम सु हाँच़ल, वेंरनस बरु यँबरज़ल ।
कति ब्यूठ, वेंम्य वेंडुस कल, कति छुस मकाम यियि कर ॥

वेंन्य छस दिवान च़वपॉरी, यियि ना सना यपॉरी ।
कदमन लगस बु पॉरी, सु छु दूरि गाम यियि कर ॥

शामन अन्योम सालय, कोरमस मे दिल हवालय ।
फीरिथ सु द्राव कालय, बेयि लोल आम यियि कर ॥

गव बांबरे मे यावुन, तेंम्य त्रोव जलवु हावुन ।
त्राव्या सु म्योन गरु युन, थाव्या मे पाम यियि कर ॥

प्रारान चमन छि गुल ह्यथ, कर यियि सु लालु मस चथ ।
यँबरज़लन अथन क्यथ, बॅर्य बॅर्य छि जाम यियि कर ॥

रॅटिनम बहानु तय हिथ, पोत ज़ूनि गोम नीरिथ ।
होवुन नु रोय फीरिथ, न्यूनम अराम यियि कर ॥

महजूर चॉन्य आलव, बूज्य संगरव तु बालव ।
चान्यव फिराकृ नालव, गछि ना सु राम यियि कर ॥



वलो लालु रोयो

महजूर

वलो लालु रोयो दिलुक दाग हावय ।
वलो सालु मस प्यालु बॅर्य बॅर्य बु थावय ॥

वलो वादु वॅर्य वॅर्य वॅर्य २थ बे वफॉयी ।
मोटुय आदनुक स्नेह, व्वं क्या ताद पावय ॥

वलो टोट जुव छुम, वंदय सुय च्ने पादन ।
यिथय पॉठ्य लोला पनुन बॉगरावय ॥

वलो लोलु ज़ख्मन मे छुम खून जॉरी ।
रटथ नालु मति, खुन मटि खारुनावय ॥

खॅटिथ पान थोवुथ, चॅटिथ परदु नेरय ।
बरस तल पनुन पान मॉरिथ बु त्रावय ॥

च्ने रोस आरुवलि दूह गुज़ोरुम कंड्यन प्यठ ।
दॅज़स हरदु ब्रॉह, दरदु के आमतावय ॥

वॅनिथ ज़ानु कस, चॉन्य लोलन कोरुम क्याह ।
यितम थावतम कन, पनुन्य दॉद्य बावय ॥

गुलव म्यानि अशि वानि वॅर्य जामु रॅगीन ।
रंगख जामु कमि वानु योदवय बु रावय ॥

वलो छुसनु महजूर, अथि लोलु वाल्यन ।
लीखिथ दरदु सोज़ुक्य गज़ल सोज़ुनावय ॥



हा गुलो त्वहि मा सु बुछवन

महजूर

हा गुलो त्वहि मा सु बुछवन यार म्योन ।
बुलबुलो तोह्य छौर्यतोन दिलदार म्योन ॥

वैन्य दिवान पोशन प्रछोम यँबरज़लन ।
आव मा त्वहि कुन सु जोदूगार म्योन ॥

दौन पोशव जोशि यिथ व्वज़ुलौव्य बाग ।
वरगु ज़न्मस आव लोलुक नार म्योन ॥

रोशि पौठ्य यितु पोशि बागुक हिथ वँरिथ ।
चानि यिनु फ्वलि दिलबरो गुलज़ार म्योन ॥

चूरि ललुवुम लोलु ज़र तस मा खबर ।
छायि छाये ज़ायि गव अमार म्योन ॥

ही पोशिक्य पौठ्य गुज़ौरुम ज़िंदगी ।
लंजि औविजि गव नु गोब ज़ांह बार म्योन ॥

आश रूज़ुम यार वात्यम अज़ पगाह ।
यी करान सोरान आव ल्वकुचार म्योन ॥

उल्फतुक सोदा कुनुम गम मँल्य ह्योतुम ।
अथ तँरीकस प्यठ चल्यव बापार म्योन ॥

खस्तु दिल महजूर सर सपनिथ वनान ।
तस मदनवारस नसॉ आव आर म्योन ॥



दिल ज़ोलथम मे नारय

महजूर

दिल ज़ोलथम मे नारय, दिलदारु वारु वारय ।
कोरथम मे पारु पारय, बे आरु वारु वारय ॥

राथा मे निश बरख ना, साथा च़ु रावुरख ना ।
उचक मुच़रिथ करख ना, कथु तारु वारु वारय ॥

नेहु गटि आख नीरिथ, शाहानु जामु पुरिथ ।
शामु छायि गोख फीरिथ, गुलज़ारु वारु वारय ॥

पोशि दूर्य मुश्कु बॅर्यथख, रसु पॉठ्य गंड मुचुरथख ।
असुवनि दहानु वॅर्यथख, आवारु वारु वारय ॥

प्रारस पोहस तु मागस, चमनस अंदर बु प्रारस ।
द्यव गुल फवलन मे बागस, दुबारु वारु वारय ॥

मस दामु दामु चॉविथ, ह्यस होश रावुरॉविथ ।
कथ कुन च़ोलुख मे त्रॉविथ, ल्वकचारु वारु वारय ॥

जानानु बु वंदय जान, छी जान जान सामान ।
जलवु चानि जान सपनान, नाकारु वारु वारय ॥

योद यारु खाबस अंदर, रोज़ख यिवान बराबर ।
अदु चानि दूरिरुक ज़र, संदारु वारु वारय ॥

महजूर छुय दवा बस, दिलु किस गमस अज़ाबस ।
अथ लोलु किस रबाबस, गंड तारु वारु वारय ॥



गुलज़ार छावुन छुम

महज़ूर

सुबह छुम बाग छुम मस्तानु दिल छुम ताज़ु यावुन छुम ।
बहारस दाद ह्योन छुम शोकु सान गुलज़ार छावुन छुम ॥

दिलुक गुलज़ार फोलमुत छुम मे पोशव नाल वोलमुत छुम ।
न कांह गुल संबुलावुन छुम, न बुलबुल तंबुलावुन छुम ॥

पज़्या शीशस लदुन पुर मस, पनुन वस ज़ांह दिज़्या गॉरस ।
दिलुक नोव बानु पनुने खानु पानय आछुनावुन छुम ॥

अथव सृत्य छुस बनावान पोश, गछान बुलबुल वुछिथ बे होश ।
छु क्या मुशिकल बनावुन गुल, तगान बुलबुल बनावुन छुम ॥

गॅरीबन बुलबुलन हुंदि खून सृत्य गुल जामु रंगुनावान ।
गुलन नोव रंग दिनु बापथ नोवुय रो मंगुनावुन छुम ॥

गुलन बुलबुल छु पतु लारान, बोम्बुर यँबुरज़लन छारान ।
वनान पुश पोशि नूलन कुन, यि दून हुंद फितनु सादुन छुम ॥

छु बिसियार बाज़रन अंदर फरीबुक माल, जुल्मुक ज़र ।
न सोदा ह्योन चुकावुन छुम, पनुन मन आज़मावुन छुम ॥

न छम कैह ज़ीरुकी हावन्य, न छम नामावॅरी पावन्य ।
रॅफीकन दरदिलन पनुन्यन, दिलुक अवहाल बावुन छुम ॥

मुवॉफिक वक्त छुम ह्यमथ ति छम सामानु हॉज़िर छुम ।
पनुन वुछु प्रंग चलोविथ दुश्मनन आसमान हावुम छुम ॥

छे ह्वछिमचु पोशि थरि बागस, कॅमी आबस गॅमुच नागस ।
खसुन छुम ओबुर लॉगिथ आसमां, बारान त्रावुन छुम ॥

ववुख पोश पोशिवुन्य चॉरिथ, तिथी बुलबुल अनुख छॉरिथ ।
नोवुय बागा बनावुन छुम, नोवुय दुनिया बसावुन छुम ॥

छे हॅस्ती पोशिवुन्य मॅस्ती, खरॉबी बे खुदी पॅस्ती ।
खुदी हुंज़ तोफ लॉयिथ बे खुदी हुंद किल पावुन छुम ॥

अॅमीरस ऑश तय शॉदी, गॅरीबस खानु बुरबॉदी ।
यिथिस मगरूर आसन वॉल्य सुंद नावुय मिटावुन छुम ॥

मॅशीदन मंदुरन गिरजन, दर्मसालन तु अस्तानन ।
यिमन यीत्यन गरन अचनुक कुनुय दरवाज़ु थावुन छुम ॥

वॅशीरुय मशरिकस बेदार करि वुज़नावि वक्तस प्यठ ।
यि आलव कॉशिर्यन हुंघन कनन मंज़ वातुनावुन छुम ॥

छु महजूर मस फिरान खास्यन, यि लोलुक मस छु, सॉरी चन ।
दपान पनुन्यन तु बेयि परघन, योहय मस बॉगरावुन छुम ॥



वैसिये आदनुक यार

महजूर

वैसिये आदनुक यार कोतुय गोम
दिल करार टोठ मदन वार कोतुय गोम ।
घख्तु कार यार म्ख्तु हार कोतुय गोम
दिल करार टोठ मदन वार कोतुय गोम ॥

तेज़ पॅक्य पॅक्य क्या हॉसिल आम
मँज़िलस वातुनय सपनुम शाम ।
चिकुचाव रोवुम, ल्वकुचार कोतुय गोम
दिल करार टोठ मदन वार कोतुय गोम ॥

हर्दुक्य वावन डोलुम होश
वॅक्य गॅयि कोस्तूर्य, बरु गॅयि पोश ।
फवलुवुन हार नव बहार कोतुय गोम
दिल करार टोठ मदन वार कोतुय गोम ॥

तस पतु लारान लूसिम पाद
खसुवुन यावुन गोम बुरबाद ।
संगदिल यार बे आर कोतुय गोम
दिल करार टोठ मदन वार कोतुय गोम ॥

शोक मंगुनोवुम पॉरिम मस
जान पान बख्तुम कलुवालस ।
बे हिसाब मस चथ खुमार कोतुय गोम
दिल करार टोठ मदन वार कोतुय गोम ॥

अज़ ताम यथ प्यठ ओसुम यकरार
अज़ कोरुम पानय तथ इनकार ।
अथ जायि वॉतिथ गाटुजार कोतुय गोम
दिल करार टोट मदन वार कोतुय गोम ।।

त्रावि येलि महजूर बाग छावुन
अदु वनि आरुवल मसवलि कुन ।
राज़दार नाज़ बर्दार कोतुय गोम
दिल करार टोट मदन वार कोतुय गोम ।।



रोशि रोशि छुख ज़लान

महज़ूर

रोशि रोशि छुख ज़लान पाय करू म्योन
बु नो ज़रु मदनो दूर्यर चोन ।
पॉर्य पॉर्य लगुयो वंदुयो क्रोन
बु नो ज़रु मदनो दूर्यर चोन ॥

आलुवन म्यान्यन छुनु तॉसीर
चानि मिलुचारुक क्या छु तदबीर ।
वनतो किथुपॉठ्य सपनख म्योन
बु नो ज़रु मदनो दूर्यर चोन ॥

शोक चानि पानस कर्योम पॉराव
मदनो अदु नो ह्योतुथम नाव ।
ज़ायि गॉम माँज़ि नम तु महारेन्य तोन
बु नो ज़रु मदनो दूर्यर चोन ॥

हुस्न दमु दमु रंग बदलावान
लोल प्रथ रंगु तस परज़ुनावान ।
पोश आयि नॅव्य नॅव्य तु बुलबुल छु प्रोन
बु नो ज़रु मदनो दूर्यर चोन ॥

रूदुम नु पानस प्यठ यखतियार
तस पथ दिल गोम युस छु बे आर ।
ज़ोरावार प्योम अज़लय लोन
बु नो ज़रु मदनो दूर्यर चोन ॥

आदनुक यार गोम थॉविथ आमताव
क्या मे फोलराव्यम सोंतुक वाव ।
दिल छा पोशि टूर असुनावोन
बु नो ज़रु मदनो दूर्यर चोन ॥

दिल महजूर तय चेश्मु मखमूर
नखु नखु ऑसिथ छि वाराह दूर ।
चेश्मव वुछ, दिलन दिलबर ज़ोन
बु नो ज़रु मदनो दूर्यर चोन ॥



कवो छुख मे त्रॉविथ

महजूर

कवो छुख मे त्रॉविथ चलान टाठि यारो ।
कवो छुख च्नु वादस डलान टाठि यारो ॥

वॅनिथ लोलु गुफ्तार च्ने ति आर अनुहय ।
च्ने डीशिथ मे ज्यव छम कलान टाठि यारो ॥

गॅजिम वारु हन हन मे अमारु चाने ।
मगर लोल नो चोन गलान टाठि यारो ॥

वोलुख मा च्नु येम्य आहे दर्दक्य गुबारन ।
तवय गुमु छुय बुथ छलान टाठि यारो ॥

हॅकीम यस च्नु आसख तॅमिस मोत करि क्या ।
सु बेमार ज़ांह नो बलान टाठि यारो ॥

छि शहमार गेसू वॅलिथ नाल दूरन ।
यिम आसन दूदस मंज़ पलान टाठि यारो ॥

अकी शक्लि फोल्यमुत्य वुछिम सासु बॅद्य पोश ।
ज़ इनसान हिव्य नो रलान टाठि यारो ॥

छे कर नुंदबॉन्य काँसि स्योद रोय हावान ।
तवय आबु मंज़ ज़ून अलान टाठि यारो ॥

छु महजूर खदवय वुछान नाज़नीन।
तँमिस नो छु दिल तंबलान टाठि यारो ॥



नाल-ए-कश्मीर

महजूर

तंबुलावान पोशि नूलन बुलबुलन गुलज़ार म्यॉन्य ।
संबुलावान रॉव्यमुत्य दिल आबशार सबज़ार म्यॉन्य ॥

आलमुक्य बेमार गरु म्योन आय वापस गॅय बॅलिथ ।
त्रेशि हॅत्य पेमुत्य वतन प्यठ जुव दिवान बेमार म्यॉन्य ॥

बु ति युथुय ओसुस नु, ओसुस वक्तु अकि बा यखतियार ।
दिन गवॉही म्यानि कनि यिम प्रॉन्य कनि देवार म्यॉन्य ॥

बागु मंज़ु म्यॅत्र तुल ज़रा आहिस्तु ब्वन कुन कर नज़र ।
सुत्य अथ मेचि छी रलेमुत्य अडु फोल्या गुलज़ार म्यॉन्य ॥

म्यानि बचनुक म्यानि गरि योद आसिहे कांह इन्तिज़ाम ।
फेरुहन मा वंदु रॉन्न दरु बदार बेकार म्यॉन्य ॥

क्या वनय वॅरियस जॅखिथ ज़ीनिथ बु रूदुस फाकु मस ।
ब्याज़-रो वान्यव तु स्वनुरव गॉब कॅर्य अंबार म्यॉन्य ॥

छुस मंगान यारब अॅमीरन ज़्यादु दौलथ कर अता ।
अथ बदल कांछान तबॉही म्यान्य दुनियादार म्यॉन्य ॥

म्यॉन्य न्यथुनॅन्य बचु रूज़ी वातुनावान प्रथ अॅकिस ।
अथ दारान छी गॅरीबन राथ दूह ज़रदार म्यॉन्य ॥

याद थव यिम म्यॉन्य मुफलिस फाकु फरि येलि थोद व्वथन ।
दौलतुक्य मौलिक बनन ऑखुर यिमय नादार म्यॉन्य ॥

जनतस मंज जाय हॉसिल करनु बापथ दिन नियाज ।
बीमु करनावन छि स्वर्गस पायि बँड्य दीनदार म्यॉन्य ॥

स्वन तु र्वफ ह्यथ द्रास बाज़र, तोरु दिग्रहम चाय नास ।
सरु सपनिम वारु पर दारुक्य छि यिम बाज़ार म्यॉन्य ॥

म्यानि लसनुक चारु करुहन, छख नु फुरसथ क्या करन ।
गर तनाजस कुन छि लॅग्यमुत्य वुन्यक्यनस अबरार म्यॉन्य ॥



लोलु चूरो म्योन दिल चय

महजूर

लोलु चूरो म्योन दिल चय, जान चय, जानानु चय ।
राहजन चय, राहनुमा चय, राहतुक सामानु चय ॥

मॉर्यमंदि कति आख, ह्यू कांह छुय नु समसारस अंदर ।
या खोतुख पातालु अँदुर, या वोथुख असमानु चय ॥

विह्य कॅरिथ ब्योन ब्योन, च्ने होवुथ पान, ब्रमरोवुथ जहान ।
ओबुर चय, दॅरिया ति चय, हाँगिन्य ति चय, दुरदानु चय ॥

छुख बेयन हुंघ ऑब गँज़रान, छय नु पानस कुन नज़र ।
जान छुख गाटुल लुकन क्युत, पनुनि विज़ि दुरदानु चय ॥

कस करान छुख पोशि पूजा, कोर कुन लॉजिथ न्यमाज़ ।
बंदगी कर पॉन्य पानस, काबु चय, बुत खानु चय ॥

क्याज़ि छुख मोहताज, कलुवालस तु प्यालस कुन वुछान ।
मस ति चय साकी ति चय, पैमानु चय, मयखानु चय ॥

लाग पानस पानु गतुरेन्य, सोज़ु पनुने ज़ाल पान ।
नार छुख चय, नूर छुख चय, शमा चय परवानु चय ॥

हीतु गरु महजूर कवु बदनाम कोरथन खा-मखाह ।
हाचु कया, इलज़ाम कया, ननि वानु हाचल पानु चय ॥



पाँदु कर पानस अंदर

महजूर

बन च्चु जौहर रंगे दिलबर पाँदु कर पानस अंदर ।
परदु साँरी दूर कर, पानस तु जानानस अंदर ॥

नेर अनि गटि निशि न्यबर, आगुर च्चु हुस्नुक सरु कर ।
कूत काला बंद रोज़ख, जुल्फे पेचानस अंदर ॥

गुल बँनिथ दूह तारु थरि प्यठ ख्वश युवुन नज़ारु हाव ।
कौड बँनिथ यँचकाल यिनु रोज़ख गुलिस्तानस अंदर ॥

परु छ्योन ओस, रूदु कतराह, म्वख्तु फोल किथु पाँठ्य गोस ।
थज़रु प्यठु बे वाय व्वठ तँम्य लॉय तूफानस अंदर ॥

मानु हा बु ति चोन इरफान, ज़ानु हा बु ति चोन ग्यान ।
पनुनि चनु बापथ पनुन खून कोनु छुय बानस अंदर ॥

मेच्चि तल बेह वॉज मंज़, नतु पर गँडिथ खस आसमान ।
यिम ज़ु ताकथ क्वदरतन थँव्यमुत्य छि इन्सानस अंदर ॥

अज़ छि तस मानान गाटुल, सुय छु ज़ीरक प्वख्तुकार ।
म्वख्तु हाँविथ फोतु यस वरतावि यारानस अंदर ॥

मज़हबन हुंघ ज़ोर गँय कम, मानमँन्य हुंद दोर आव ।
समयि फ्युर गव, च़ाव साइन्स दीनो ईमानस अंदर ॥

याद थव महजूर सुय बनि दुनियाहस मंज़ बा कमाल ।
ज़िंदुगी गुज़रावि युस शोकस तु अरमानस अंदर ।।



न्याय त्राँविव माय थाँविव

महजूर

न्याय त्राँविव माय थाँविव पानु वॉन्य ।
पोज़ मोहबथ बाँगुराँविव पानु वॉन्य ॥

साफ थाँविव सीनु मँशराँविव फसाद ।
कीनु त्राँविव दाँद्य बाँविव पानुवॉन्य ॥

वक्ते मुश्किल ह्यमतो समतो वँगरिव ।
अख अँकिस अथु शेहलाँविव पानुवॉन्य ॥

ज़ाथ बुतराथ काँशुर्यन हुंज़ छवु कुनिय ।
खामुखाह दूर्यर मु पाँविव पानुवॉन्य ।

दूद छु मुसलिम ह्यौद छु शकर साफ साफ ।
दूद तु बेयि शकर रलाँविव पानु वॉन्य ॥

हँद्य रटन नम खूर वायन अहले दीन ।
नाव येमि मुल्कुच चलाँविव पानु वॉन्य ॥

कोर बटस पथ जुव फिदा कुदि गोजिवॉर्य ।
अज़ तिमय कथु याद पाँविव पानु वॉन्य ॥

रँछ सिरिज काकन मुसलमान गबर ग्रँज़ ।
दिल तिथय पाँठ्य मिलुनाँविव पानु वॉन्य ॥

सानि वतनुक कुस छु दुश्मन कुस छु दोस्त ।
जहल त्राँविथ गँज़रॉविव पानु वॉन्य ॥

गॉर न्वकसान करि नु तुहँदिस इज़तस ।
युथ नु तुह्य इज़थ हरॉविव पानु वॉन्य ॥

गर तनाज़स गॉर शूब्या ? ? ? ? ।
न्याय वतनुक्य अँज़रॉविव पानु वॉन्य ॥

अख अँकिस प्यठ युथ नु ज़ांह काँछिव बँदी ।
युथ न साँ ज़ांह रावरॉविव पानु वॉन्य ॥

योद थँविव अथुवास त्वहि पोशव नु कांह ।
छ्यन कँरिथ यिनु पोशिनाँविव पानु वॉन्य ॥

पानु वॉन्य यिनु अख अँकिस दुश्मन बँनिव ।
फितनु यिनु ज़ांह वुज़नाँविव पानु वॉन्य ॥

कुस दपान छुवु बाँगरॉविव कुल्य तु पोश ।
बुलबुलव गुलज़ार छाँविव पानु वॉन्य ॥

बाँय सुंद बाँयिस शूब्या थावुन मलाल ।
गंड दिलन हुंघ मुन्नरॉविव पानु वॉन्य ॥

हेछिनाँव्यूख रुत पकुन नादान बाँय ।
अख अँकिस ह्यमथ बडाँविव पानु वॉन्य ॥

यिम गँरीब आसन तिमन अथु रोट कँरिव ।
बाँय बाँय छिवु रँछुरॉविव पानु वॉन्य ॥

मिलुन्नारुक द्युत यि महजूरन सबक ।
याद थॉविव बोज़ुनॉविव पानु वॉन्य ॥



नोव दुनिया

महजूर

नोवुय गुल तय नोवुय बुलबुल, नोवुय गुलज़ार आसुन गोछ ।
नोवुय मस तय नोवुय साकी, नोवुय पैमानु आसुन गोछ ।।

नोवुय बुतराथ नोव असमान, नोवुय रव तय नोवुय परतव ।
नोवुय सुबहा, नोवुय शामा, नोवुय समसार आसुन गोछ ।।

नव्यन वानन नोवुय ह्योन ह्युन, नव्यन बानन नोवुय सोदा ।
नव्यन वान्यन नोवुय बापार, नोवुय व्यवहार आसुन गोछ ।।

वुन्युक तामथ तरान आय प्रॉन्य सॉरी प्रानिवुय तारव ।
व्वं अथ सँदरस तरन वाल्यन नोवुय कांह तार आसुन गोछ ।।

स्यठाह प्रान्योव रस्मे हुक्मरॉनी यथ जहानस मंज़ ।
नोवुय कोनून नोवुय दफ्तर, नोवुय दरबार आसुन गोछ ।।

कितॉबी मज़हबुक मिलुच्चार, ज़ेवि हुंद कोल गव प्रानान ।
दिलन अंदर नोवुय लोलाह, नोवुय समच्चार आसुन गोछ ।।

व्वं कोताह काल कमज़ोरन करन पामाल ज़ोरावार ।
यिमन कमज़ोर इनसानन ति दिल हुशयार आसुन गोछ ।।

द्वहस जुव जान च़ॉटिथ शामस अँडुय च़ोट छुम दिवान मॉलिख ।
कमस रॉज़ी बु, सु ति म्यॉनिस गमस तन दार आसुन गोछ ।।

गॅरीबन क्युत छु यक अनार व सद बेमार मुश्किलु सान ।
दपान ज़रदार अख बेमार हथ अनार आसुन गोछ ॥

बु करु हा काँसि हुँदिस कोलु सुय पथ जुव पनुन क्वरबान ।
अथ अहदो पैमानस दिलुक यकरार आसुन गोछ ॥

अगर ज़िमुदार म्याँनी ज़्यव छे म्यान्यन सारिनय स्वखुनन ।
खयालन दिलचन रायन ति कांह ज़िमुदार आसुन गोछ ॥

वनस मंज़ रोज़ु हा तन्हा, दिलुक हाल रॉयिलन वनुहा ।
बहारुक ज़ोर आरुक शोर, अच़ुवुन हार आसुन गोछ ॥

चवान पर मस, लगान छुम रस, स्यटाह छुस लोग मँदरेरस ।
बु वतनुक लोलु मस चमु हा, मगर मज़दार आसुन गोछ ॥

वुछिथ महज़ूर नविरस कुन, नोवुय रंगाह ह्यवान हावुन ।
नँविस समयस नँविस दोरस, नोवुय गुप्तार आसुन गोछ ॥



वज़नि लोग बेयि

महज़ूर

वज़नि लोग बेयि जिंदगी हुंद साज़ म्योन ।
साज़ म्योन इज़हार करि व्वन्य राज़ म्योन ॥

बाग म्योनय, गुल ति म्योन, सुम्बल ति म्योन ।
बोलवुन बुलबुल छु ख्वश आवाज़ म्योन ॥

पंजर मंज़ु नीरिथ वुफुन यामथ ह्योछुम ।
आसमानस प्यठ ति गव परवाज़ म्योन ॥

कमि मज़हबु खुन म्योन ज़ोनुख हलाल ।
स्रोग कुनुन त्रौवुख वतन प्यठ माज़ म्योन ॥

खत्म गच्छि चंगेज़खॉनी शोर व शर ।
रोज़ि कौयिम ता अबद शीराज़ु म्योन ॥

रातु म्वगलस ज़रवि कुस चमनस अंदर ।
पंजि दिथ तस लंजि कडि शाहबाज़ म्योन ॥

आसि योद फौलाद तन इस्फंद्यार ।
तस अँछव किन्थ मारि तीर अंदाज़ म्योन ॥

हमलु करि यमराज़ ह्यू दुश्मन अगर ।
पथ कोहन तस लार करि कमराज़ म्योन ॥

दोप यि साज़न बोज़ि कुस म्योन सोज़े दिल ।
कुस छु महज़ूरस वरौय हमराज़ म्योन ॥



साकिया बेताब कोरथस

महजूर

साकिया बेताब कोरथस, चावतम शोकुक शराब ।
त्रावतम गमगीन दिलस मंज़ दर्दो सोज़ुक इज़तराब ॥

वाव सुबहुक चाव बागस, सुत्य पानस क्याह औनुन ।
बुलबुलन क्युत ऐश-ो-राहत रातु म्वगलन क्युत अज़ाब ॥

आवलुन छोर प्यालु ह्यथ फेरान नन्नान रातस दूहस ।
द्युत नु आसन वॉल्य दॅरियावन तॅमिस अख कतरु आब ॥

मंगुनुक तय ज़ारु पारुक वक्त गव, नौव दौर आव ।
यस मछन मंज़ ज़ोर आसन, रोज़ि सुय व्वन्य कामयाब ॥

वलवलाह, जोशाह, हुबाबाह, इज़तराबाह, ह्यमथाह ।
पाँदु गछि यामथ दिलन अंदर तु सुय गव इनकलाब ॥

म्योन बुड्य बब मालो जान ह्यथ, त्रामु पाँसन कुननु आव ।
माल होरुम, जान छिम बाकी कडान, वुछतव हिसाब ॥

नखवतुच खँहरन लँजिख, अवज़ार जुल्मुक्य तेज़ गँय ।
वक्तु विज़ि म्यकराज़ जुल्मुच च़टि ग्वलॉमी हुंज़ तनाब ॥

लछि बँद्य लूख बाग छावन, गुल नवन, बुलबुल ग्यवन ।
क्याह हर्ज केन्नन पुशन हुंद्य खानु योद सपनन खराब ॥

गर्जु पनुने यिम छि आजॉदीये मुल्कृचि बर खलाफ ।
वक्त येलि सॉबित कर्यख, पनुन्यन शुर्यन क्याह दिन जवाब ॥

यक तरफ रोज़ त्रॉविथ ऐ दुश्मने गुलज़ारे कौम ।
छुम कुल्यन सग वातुनावुन, सानि क्वले फ्यूर आब ॥

वाव असुनावान गुलन, महजूर वुज़ुनावान दिलन ।
यिम जि अमि निशि बे खबर, क्याह गव ग्वनाह, क्याह गव सवाब ॥



नोवुय शोरा छु

महजूर

नोवुय शोरा छु वुन्यक्यन बागु क्यन जानावरन अंदर ।
नोवुय सोजा छु तुलमुत पोशि नूलव पंजरन अंदर ॥

स्यठाह पॅक्य पॅक्य तु थॅक्य थॅक्य कारवां छुनु मँजिलस वातान ।
खरॉबी कस्मतुच छा या छे खॉमी रहबरन अंदर ॥

बहारस तुलरि गछुहन दूर, अनुहन व्यूर सौबुरॉविथ ।
फिजा छुनु साफ, तिमु गुं गुं करान पनुन्यन फरन अंदर ॥

ठिपिस मंज जिंदगी हुंघ ज़्यादु दूह योदवय मे गुज़रॉविम ।
छु बाक्य कुवते परवाज़, वुनि म्यान्यन परन अंदर ॥

नज़र शाह पॉज़ संज़ छुनु बँस्तियन प्यठ, छुस थज़र वाराह ।
पनुन रूज़ी छु छारान पानु बालन संगरन अंदर ॥

न अँज्यक्यन आशकन अंदर तमन्ना सर फरोशी हुंद ।
न शाने दिलबॅरी काँयिम छि अँज्यक्यन दिलबरन अंदर ॥

वँसिथ ब्वन ब्वन ग्रज़ान यिम आरु, गछ वुछ यिम छि कति यिवान ।
यि शोरो शर यि बद मँस्ती वुछख कर आगरन अंदर ॥

बड्यन हुंघन गरन अंदर छु जानुक डर तु मालुक ज़र ।
छे ह्यथ तय दिलेरी मुफलिसन हुंघन गरन अंदर ॥

छु अक्सर पाक सीरथ दूरि रोज़ान छा़यि लूकव निश ।
तवय लोब कुन छि रँटमुच्च जाय पम्पोशव सरन अंदर ॥

ह्यकान छुनु रोफ वॅरिथ व्वसताद म्यान्यन सीनु क्यन चाकन ।
गँमुच्च कमज़ूरियाह पॉदा छे शायद रोफ गरन अंदर ॥

चु थव महजूर काँयिम शाने ख्वद दाँरी ज़मानस मंज़ ।
योहय जौहर अज़ नायाब सान्यन शॉयिरन अंदर ॥



आज़ादी

महज़ूर

सना सॉरी पॅरिव सान्यन गरन मंज़ चायि आज़ादी ।
स्यठाह यॅच्चकॉल्य असि कुन जलवु हावान आयि आज़ादी ॥

यि आज़ादी ग्वडन्य येलि द्रायि नॅन्य हिदूस्तानस मंज़ ।
लछव पॉठ्य आयि इनसानन लदान तिलु क्रायि आज़ादी ॥

यि आज़ादी छि त्रावान मगरिबस कुन रहमतुक बारान ।
करान सॉनिस जॅमीनस प्यठ छरेय गगरायि आज़ादी ॥

गॅरीबी मुफलिसी बेबूज सुत्य ह्यथ खानु वॉरॉनी ।
अमी रुचि त्रायि असि प्यठ आयि त्रावान सायि आज़ादी ॥

यिमय चीज़ असि ग्वलामन ऑस्य जॉलिम ज़ोरु मॅल्य ह्यावान ।
कुनान ती बाज़रन अंदर वॅरिथ मुलु मायि आज़ादी ॥

चे क्या बूज़ुथ यि आज़ादी, यि छा करु मुठ कुनुन बाज़र ।
छे रॅटमुच्च होटलन मंज़, आयि लिपटन चायि आज़ादी ॥

यि आज़ादी छे क्वकराह जान, स्वनु सुंघ टूल कैह त्रावान ।
तिमय कैह टूल ह्यथ व्वन्य बीठमुच्च बेयि प्रायि आज़ादी ॥

यि आज़ादी छे स्वर्गुच हूर, फेर्या खानु पतु खानय ।
फकत कॅन्नन गरन अंदर छे मारान ग्रायि आज़ादी ॥

यि आजॉदी दपान सरमायिदॉरी छनु कुनी थावन्य ।
व्वं पनुन्यन निशि छे सॉबरावुन ह्यवान सरमायि आजॉदी ॥

लुकन प्यठ गॅयि यि आजॉदी स्यठाह गोब हारि परबथ ज़न ।
छे केंचन ख्वश नॅसीबन पोशि तुल्य ज़ुय डायि आजॉदी ॥

लडान येलि हॉल्य तय चकदार, छि वालान अख अँकिस तिम रथ ।
तमाशा छख वुछान ल्वति पॉठ्य रूज़िथ छायि आजॉदी ॥

लुकन मातम, गरन अंदर बिहिथ महाराज़ु ही हॉकिम ।
यिमव रॅटमुन्न छे पानस सुत्य खलवथ शायि आजॉदी ॥

गॅरीबन वारसी करुहन मगर छनु हॉकिमन फुरसथ ।
तिमव लॅब मोटरन अंदर, दवान थदि पायि आजॉदी ॥

गॅमुत्य दम फुट्य छि सॉरी, बे करॉरी छख दिलन अंदर ।
दपान वनुहव पनुन अहवाल, असि मा लायि आजॉदी ॥



साहिबो सथ छम मे चॉनी

महजूर

साहिबो सथ छम मे चॉनी, वथ मे असलुच हावतम ।
कूत कालाह रोज़ु बे ज़ान, ज़ॉनि हुंद मस चावतम ॥

बोज़तम पॅरियाद व ज़ॉरी, सोज़तम दाद्यन दवा ।
रोज़तम हर दम मेहरबान, ज़ांह ति परु मतु पावतम ॥

कॉहिली, कम ह्यमती, वसवासु निशि थवतम मे दूर ।
वलवलाह, जोशाह तु अरमानाह दिलस मंज़ त्रावतम ॥

ज़ांह मतु वनुनावतम अफसानु नैदुर पावनुक्य ।
म्वरदु येमि सुत्य ज़िंदु सपनन, तिथ्य वचन वनुनावतम ॥

यिम सुखन पॉदा करन, खलकन अंदर उलफत तु लोल ।
दूर येमि सुत्य गछि नफरत, ती वनुन हेछिनावतम ॥

फवलनोवथस पानु अच्चुवनि ज़ेठु वावुचि ग्रायि सुत्य ।
सोरवुनि मंजहोरु तापुकि ज़ोरु मतु छँचरावतम ॥

शबनमुक्य पॉठ्य आफताबस कूत काल करु इन्तिज़ार ।
ग्वडनिचे अनवारि पोशन सुत्य सुलि वुज़नावतम ॥

शक्लि छुस इनसान मगर इनसॉनियतु निशि बे खबर ।
ह्यावतम मतु इम्तिहान, येमि शक्लि मतु मंदुछावतम ॥

दूर छुस प्योमुत लुकव निशि, छुम तवय महजूर नाव।
तिम अगर दूरन मे निशि, च्चु ति दूर मतु ज़ांह त्रावतम।।



सालस अनतनी बॉलिये

रसूल मीर

लालस वनतय छुस सवाल । सालस अनतनी बॉलिये ॥

मदु छस अज़ छुम कमाल, अदु नय रोज़्यम कॉलिये ।
वदु ना रोवुम जमाल, सालस अनतनी बॉलिये ॥

चारदान तय काँटु माल, तस कित्य छिम कनु वॉलिये ।
कनु पँकल्य बंगॉल्य छाल, सालस अनतनी बॉलिये ॥

खूब रोय माह मिसाल, अबरो छिस ज़ु हिलॉलिये ।
रुबरु डेशुन महाल, सालस अनतनी बॉलिये ॥

अँलिफस कोरनम दाल, जुल्फन क्याह छिस ज़ॉलिये ।
उल्फतु वोलुनम नाल, सालस अनतनी बॉलिये ॥

डीशित्त तँम्य सुंद खाल, दाग ह्यथ ज़ून गँयि खॉलिये ।
सूरुस हुस्नुक खयाल, सालस अनतनी बॉलिये ॥

मस खॉस्य मालामाल, बँर्यनस कँम्य कलुवॉलिये ।
चेशुम छस रश्के गज़ाल, सालस अनतनी बॉलिये ॥

मोहु तीर अँछर वाल, जिगरा कँर्यनम ऑलिये ।
वनुहस बोज़ि ना हाल, सालस अनतनी बॉलिये ॥

रोशन छुस म्योन हाल, रोशन कवु छुम बॉलिये ।
पोशन करुसय माल, सालस अनतनी बॉलिये ॥

नेरान छुस नु मलाल, फेरान छुम बॉल्य बॉलिये।
रसूल छुस दिवान नाल, सालस अनतनी बॉलिये।।



हॉरिये थावख ना कन तु लोलो

रसूल मीर

हॉरिये थावख ना कन तु लोलो । ज़ार म्यॉन्य तोतस वन तु लोलो ॥
मदनस वनतसे अनतसे आर । वदनस छुम नु ज़ांह छ्यन तु लोलो ॥
बॉलिये वनतसे कॉल्य राव्यम । वॉल्य कन ज़ॉल्य छा स्वन तु लोलो ॥
बादाम चेश्मु यनु मुन्नराव्यन । तनु छुम मॅन्नरावन तु लोलो ॥
जुल्फु छस जीम तय मीम दहान । सीमाब ख्वय सीम तन तु लोलो ॥
ससनु मे कोरनम कामु दीवन । स्वनु छम पामु दिवन तु लोलो ॥
हियि कोरनम क्वंगु पोशुक रंग । योस्मन गॅयम सोसन तु लोलो ॥
हारुने तापय गॉजनस बो । दॉन्य दान्य शीनु मॉन्य ज़न तु लोलो ॥
आलम गेलि तु क्याह छु परवा । मेलि येलि सोदा वोन तु लोलो ॥
बरुसय द्यन सॅन्यास्यन सुत्य । करुसय तॉवीज़ु पन तु लोलो ॥
अँश्कुने आवरेनि मंज़ छु पोंपुर । नारु पान वारु ज़ालन तु लोलो ॥
डूरि तय वेरनागु हेमुसय ज़ाग । रोसुल मीर तॅत्य छु आसन तु लोलो ॥

★ ★ ★ ★ ★

बाल मरॉयो

रसूल मीर

बु ति नो यि दूर्यर चोनुय ज़रय, बाल मरॉयो ।
क्याह करु थोवथम ज़रु ज़रय, बाल मरॉयो ॥

दिल खस्तु कॅरथस नस क्याह छय, र्वपु सुंज़ शमशेर ।
कम शेर मॉरिथ खंजरय, बाल मरॉयो ॥

दिलबरु अछतो म्यानि बरय, द्यवु बरय द्यन ।
चे रोस गुल ज़न गॅयिसु बरय, बाल मरॉयो ॥

शहमार जुल्फव नाल वोलुहम, रूद अफसानय ।
व्वन्य वनतु कम अफसानु परय, बाल मरॉयो ॥

अंबरु नॉविथ पान पॉरान छस बु यँबरज़ल ।
बॉबूर म्याने अंबरय, बाल मरॉयो ॥

थरु छम मे हुरान आयि हरान, हुस्नु थरे गुल ।
दिल छुम नु ह्यवान थरु थरय, बाल मरॉयो ॥

शरमंदु कॅरथस आफताबो, कंदुहारुच ज़ून ।
कजि चानि गॅजसो लॅजुस दरय, बाल मरॉयो ॥

छुम खफु लारय पतु लायय ब्रोंठ नालस थफ ।
दामानु रटय महशरय, बाल मरॉयो ॥

शमशाद खामत आम हलान बार अँशुकुन हीथ ।
खम गोम पुश्तस लूचरे, बाल मरॉयो ॥

यथ लोलु बागस ज़ख्मे दिल गुल, सरव म्योनुय आह ।
अँश वानि सुती ज्वयि फिरय, बाल मरॉयो ॥

ह्यसु व्यसुरॉवथस असि रोस्तुय, व्यसु कमो छय ।
तिम सानि खोतु छा स्वंदरय, बाल मरॉयो ॥

ननि कथु वनिनम अनि गटि अँम्य लाल फरोशन ।
कनि मंज़ु नेरान जौहरय, बाल मरॉयो ॥

ज़ेबा बु द्रायस बोज़ु नेबाह चोन निगारो ।
त्रेय पतु द्रायस क्रानि गरय, बाल मरॉयो ॥

हा रंजि बुमय चानि लायान रुमु रुमय तीर ।
वॉलिंजि वॅर्यथम पंजरय, बाल मरॉयो ॥

बो शरमि गँजुस शर मे गोमो, कर मे ज़ोनुम हय ।
अज़ कोर मे करमय लोन सरय, बाल मरॉयो ॥

रोसुलि गोलथस होलु ह्यसय, कोलु मसॉ डल ।
बो लोलु मसय खॉस्य बरय, बाल मरॉयो ॥



चानि छुम जानुक कसम

रसूल मीर

यारु लोगुथ संगदिल, चानि छुम जानुक कसम ।
मारु कोरथस तंगदिल, गंचे दहानुक कसम ॥

यारु दोदुय कूठ प्योम, बार अँशुकुन मे गोब्योम ।
अँलिफु कदुसुय दाल गोम, सरवि रवानुक कसम ॥

स्वरमु नाजुक छुय अँछन, स्वरमु रूदुम नु वुछन ।
खश्म हत्योप छुख बुछन, चेशिम मस्तानुक कसम ॥

चेशिम बादाम या छु ब्रम, रशिक आहूये हरम ।
नरगिस बागे इरम, चानि इरफानुक कसम ॥

उल्फतुच लॉयिथ कमंद, ज़ालु लोगुथ चीन-ओ-हिंद ।
छलु दिल कोरथम मे बंद, जुल्फे पेचानुक कसम ॥

जुल्फि सौंबुल प्यठ गुलन, लॉग्यमत्य ज़ाल बुलबुलन ।
आशकन दिल तंबुलन, स्वंबलिस्तानुक कसम ॥

आशनॉई ऐ सनम, बे वफॉई दम ब दम ।
दुन जुदॉई छे सितम, ताज़ु यारानुक कसम ॥

नाद लायेय गुलबरो, सादु वॅरथस गुलबरो ।
वादु डोलुहम दिलबरो, अहदो पैमानुक कसम ॥

तीर अँशुकुन दर जिगर, ह्यथ बु गेसू दर ब दर ।
कर मे नेर्यम व्वन्य न्यबर, तीरे बारानुक कसम ॥

बुमु कमान मिच्चु तीर, हॉव्यथम वॅरथस असीर ।
मारु गॅय बर नाव पीर, तीर कमानुक कसम ॥

बे करॉरी यस दिलस, आसि माने ज्ञानि तस ।
नतु रोसुल मीर हावि कस, मोये म्यानुक कसम ॥



दिलाराम निगारो

रसूल मीर

दिलबंदु दिल आजारु दिलारामु निगारो ।
गुल खंदु गुल र्वखसार, गुल अंदाम निगारो ॥

कद चोन अँलिफ लाम, जुल्फ मीम दहन छुय ।
पोर अक्लि सबक शक्लि अँलिफ लाम निगारो ॥

शमशाद कामथ गुलबदन, लब ग्वंचि सुंबुल मोय ।
बंगॉल्य जादू चेश्मु छय बादाम निगारो ॥

वुछ आफताबन चोन चंदन म्वख तु डोलुस रंग ।
गँज काचु तवय जून, छुस सरसाम निगारो ॥

सौंबुल छु त्रॉविथ कॉर लालन बर जिगर सुय दाग ।
छुय दामे काकुल खाले सियाहफाम निगारो ॥

खत वेंडिथ अज़ खत गॅयसु दर खत पेयसु जुल्फन मंज़ ।
अज़ शाम नीरिथ ताम वोतुम शाम निगारो ॥

दर जंग करान कारे खंजर दस्ते रँगीन चॉन्य ।
हम पंजु दस्तान छुय नु रुस्तुम-ओ-साम निगारो ॥

यस कारे थज़र आसि शमा रोय आतश खोय ।
योद मारि तस परवानु अज़ बहराम निगारो ॥

चथ गोख पानस प्वख्तु कोरथम याद फरामोश ।
कुस न्वक्तु वनय बालि द्युतुहम जाम निगारो ॥

च्यूनम नु चोलुम यार आरुदमुत सु पारुद ज़न ।
आराम न्यूथम ज़ांह नु गोहम राम निगारो ॥

गिल ज़न बु छुनय जामु च़ैटिथ, नेर बु बाज़ार ।
पदमॉन्य आशक छस च़े पत्तु बदनाम निगारो ॥

छुम जान कौंसिद पानु पृछिज्यस हाले दिल आज़ार ।
नय खामु ज़ानय नामु तय पैगाम निगारो ॥

सीतायि गथ वॅर्य लोलु नारस बालुयारस पथ ।
कम गीत वॅन्य वॅन्य राम कोर तमि राम निगारो ॥

दर दोरे हुस्नत चेश्मु वुछिथ कासु गदा चॉन्य ।
ख्वरशीद तय जमशीद ह्यथ छी जाम निगारो ॥

दिथ छालु च़ोलुहम, कोलु डोलुहम, दोलु वुछथम नो ।
लोल आम व्वंदस होल कर ज़ांह द्राम निगारो ॥

रोसुल छु ज़ॉनिथ दीन-ओ-मज़हब र्वख तु जुल्फ चॉन्य ।
कवु ज़ानि क्याह गव कुफुर तय इसलाम निगारो ॥



व्वलय कोस्तूर्यये

रसूल मीर

चोन पकनुय परज़नोवमय दूर्यये ।
व्वलय कोस्तूर्यये, पुर्य मय त्राव नीर्यये ॥

मटन वुडिरे हुक़ सान छख खसान
टिक़ दार कसाबस ग्रायि छखय मारान ।
कौकुल मस्तस म्वख्तु शूबिये जूर्यये
व्वलय कोस्तूर्यये, पुर्य मय त्राव नीर्यये ॥

नावि नमस प्यठ हम तु खूर छख वायान
यिमु नुय आशकन तीरि मिन्नगान लायान ।
हम गोम आबस, नम रठतय यूर्यये
व्वलय कोस्तूर्यये, पुर्य मय त्राव नीर्यये ॥

सुलि वँथिथुय ज़ीर्य द्रायिखय काठस
बदनाम कोरथस खनुबलकिस गाठस ।
काठु कौन्य ज़ौलिथ नार गोवुये सूर्यये
व्वलय कोस्तूर्यये, पुर्य मय त्राव नीर्यये ॥

वेरु नागय नेरुये बु आगुये
अछु वलु की पोश शेरे लागुये ।
वछु मंज़लिस मंज़ रछथ दछि मूर्यये
व्वलय कोस्तूर्यये, पुर्य मय त्राव नीर्यये ॥

छाय डीशिथ रोसुल मीरस ज़ौन्यखय
कदे सनोबर, सरवि बाला मँन्यखय ।
दय येलि दी तय, ड्यक़ पनुने पूर्यये
व्वलय कोस्तूर्यये, पुर्य मय त्राव नीर्यये ॥

★ ★ ★ ★ ★

मे छु मूरे ललवुन नार

रसूल मीर

गछ तु वेसिये, लाल छुम दूरे। मे छु मूरे ललवुन नार ॥

हशि लोयनम ज़ॉविजि मूरे, पूछि कोरनम पॉट्य अंजोल।
गछु माल्युन तिम छिम दूरे, मे छु मूरे ललवुन नार ॥

माजि रँछनस कंदु कोस्तूरे, आमि दूद सुत्य नॉवनम तन।
सुय पान लोगुम मेचि मोज़ूरे, मे छु मूरे ललवुन नार ॥

गरि द्रायस गरिक्यन चूरे, नील नागय लूसुम दूह।
राथ लँजिमो राह मुसाफूरे, मे छु मूरे ललवुन नार ॥

डँब्य दादे त्राव्यम चीरे, डँब्य दॉद्य कँरुस फलवा।
यस नु दय दियि ड्यक कति पूरे, मे छु मूरे ललवुन नार ॥

पथ वनु छुख किनु पथ वीरे, योर अनतन ख्वनि ललवान।
न्यथु नँन्य छस दज़ु मा तूरे, मे छु मूरे ललवुन नार ॥

आयि कुकिला मॉदान दूरे, स्व छे परान अल्लाह हू।
स्व छे लँजिमुन्न वालु वाशु दूरे, मे छु मूरे ललवुन नार ॥

छु रोसुल मीर शाह आबाद डूरे, तँम्य छु त्रोवमुत लोलु दुकान।
यी दुआ आशकव चेषु टूरि टूरे, मे छु मूरे ललवुन नार ॥

★ ★ ★ ★ ★

शर मे जिगरस द्राम नय

रसूल मीर

थरु थरु छम मरु शायद, शर मे जिगरस द्राम नय ।
ख्वश यिवुन नुंदबोन वेसिये, म्योन दिलबर आव नय ॥

वादु कोरमुत याद छुय ना, सादु कुच्चा जॉन्यथस ।
आदुनय अदु कोनु थाव्योथ म्योन दिल संबलावनय ॥

यारु अख अरमान रूदुम, अशुकु पेचानस पृछोम ।
बूजिथुय रजि पान खोलुन, आव ज़न अबसावनय ॥

छायि रूदुख ज़ायि वॅरथस, कव च़े मॅठुय माय म्यॉन्य ।
तेलि च़े फ़ेरी ना मे वनतम, येलि मे मेच़ि तल सावनय ॥

गुल वुछिथ बुलबुल छु तोशान, अख अँकिस रूशिथ वनान ।
म्यानि यारो चानि बागुक रूद मे गुलज़ार छावनय ॥

सुय मे रूदुम आश येम्य सुंज सथ मे ऑसुम यथ दिलस ।
वनतु रोसुल्यो कस च़ु रूदुख, व्वन्य कमू मनुनावनय ॥



रिंदु पोशि माल गिंदुने द्रायि लोलो

रसूल मीर

शूबि शाबाश चानि पोत छायि लोलो ।
रिंदु पोशि माल गिंदुने द्रायि लोलो ॥

राज़ु हाँज़्यानि नाज़ कया अँज़्यानि गर्दन
या इलॉही चेश्मु बद्दु निशि रछतन ।
गछि कया कम चानि बारगाहि लोलो
रिंदु पोशि माल गिंदुने द्रायि लोलो ॥

कालु मोयस टाकॉन्ध छय बरसर
फँल्यलु नाफय मोलमुत मुश्कि अदफर ।
हँज़ि पॉरान च्वँजु तय दायि लोलो
रिंदु पोशि माल गिंदुने द्रायि लोलो ॥

जाँल्य वाँकन बाल येलि लागि शुमार
पछ लगनस गँज़रुनस लछ तय हज़ार ।
तमि शायि नो म्वकलन पायि लोलो
रिंदु पोशि माल गिंदुने द्रायि लोलो ॥

रवनि ग्वडुकुय यामथ बूजुम साज़
साज़ बोज़ुनि आमुत राज़ु यँदराज़ ।

पोशि मालु छम पोशि तुल्य डायि लोलो
रिंदु पोशि माल गिंदुने द्रायि लोलो ।।

हल्कु बंदु तैल्य शुबान नारे पिस्तान
ती डीशिथ आशकन दिल लूबान ।
वोल रोसुल मीर चाने मायि लोलो
रिंदु पोशि माल गिंदुने द्रायि लोलो ।।



क्याह वनुयो मति अँर्यनिमाल

क्याह वनुयो मति क्याह वनुयो

यी गोम पानस तु ती वनुयो
लान्युन न्याय छुम तु ती वनुयो
क्याह वनुयो मति क्याह वनुयो

बागस म्यॉनिस बादाम फुलुया
आदनु रॉवुस तु ती वनुयो
क्याह वनुयो मति क्याह वनुयो

बागस म्यॉनिस चेरु फुलुया
वेरि चानि फोजमा तु ती वनुयो
क्याह वनुयो मति क्याह वनुयो

बागस म्यॉनिस गिलासु फुलुया
दिलासु द्युतुथाम तु ती वनुयो
क्याह वनुयो मति क्याह वनुयो

बागस म्यॉनिस टंगु फुलुया
लंजि लंजि फोजसा तु ती वनुयो
क्याह वनुयो मति क्याह वनुयो

बागस म्यॉनिस ऑल्यचि फुलुया
लोलुची करिथम तु ती वनुयो
क्याह वनुयो मति क्याह वनुयो



ञ्जोलुमय यार वेसी

अर्यनिमाल

यान्य हूरि मे तूरि चंद्रुन मोलुमय
तामथ च्जोलुमय यार वेसी

दप्योम आगस, बो रोशि ज़ागस
लागस बो शेरि ही
व्वंदुकिस बागस पोशाह फोलुमय
तामथ च्जोलुमय यार वेसी



अर्यनि रंग गोम श्रावन हिये

अर्यनिमाल

अर्यनि रंग गोम श्रावन हिये
कर यिये दरशोन दिये

शामु स्वर्य पामन लॉजिस
आमतावव कोताह गॉजिस
नामु पैगाम तस कुस निये
कर यिये दरशोन दिये

कंदु नाबद आरादमुतुय
फंदु वरिथ चोलुम कोतुय
खंदु वर्यनम लूकन थिये
कर यिये दरशोन दिये

सुलि व्वथव संगरमालन
लालु छारोन कोहन तु बालन
प्रारान छस बु तैहिंजि जिये
कर यिये दरशोन दिये



हृद्वि लोमुनम

अर्यनिमाल

हृद्वि लोमुनम नैदरि हृद्वि मद्रि
मछि मछुबंद सैनिथ गोम
स्वन न्यूनम रद्रि रद्रि
वुन्यूब वॅरिथ गोम
वनतु वेस्य व्वन्य कुस कस पद्रि



रातस ओसुम लॉरिथ अॅर्यनिमाल

रातस ओसुम लवु ज़न लॉरिथ
सुबहस प्रवि क्यथु त्रॉविथ गोम
बबरि च़मन अशि सगुनॉविथ
ऑशिमोत कवु पशिनाॅविथ गोम
सवाल वॅर्यतोस हियि गछि छाॅविथ



आलव दीतोसे

अँर्यनिमाल

मे शोकृ यारु सँदि बँरिमस प्यालु तु

आलव दीतोसे

तरवुनि मर्गय वसवुनि बालु तु

आलव दीतोसे

क्याह करु नियिनम हरनुनि छालु तु

आलव दीतोसे

कंद तय नाबद बँर्यमस थालु तु

रंगु रंगु नीतोसे

जोद गव आशकन दोद क्यथु चालु तु

आलव दीतोसे

★ ★ ★ ★ ★

कॅहंदि बो ज़ायस

अॅर्यनिमाल

वुछतु वेस्य कॅहंदि बु ज़ायस
बागुनि आहस कॅहंदि ताम
द्वह अकि मॉल्य माजि नगरु हरशायस
शहरुच ऑसुस वॉचुस गाम
सति दोह्य फीरिथ मालिन्यव अन्यायस
बागुनि आहस कॅहंदि ताम

द्वह अकि श्रेहु सान माल्युन गॅयायस
उचकु बजि काकुनि दिचुनम पाम
उचकु रॉछ ज्यवुनुय कोनु म्वयायस
बागुनि आहस कॅहंदि ताम



अदु कर यियम तय

अँर्यनिमाल

अदु कर यियम तय
बरुसय मलुर्यव मलुर्यव
चेयिना सना मस
छाविना सना मस

कमि स्वनि हॉवुनस तन
कॉल्य हय वुहुनम पॉठ्य ? संगरन

हलि छुस खंजर तय
तीर हय लॉयिनम पोशि पंजरन



पदमॉनी कर यियम

अॅर्यनिमाल

पदमॉनी अदु कर यियम तय
वदुनस छुम ना छ्यन
ओश छस त्रावान चालि चालि
मसि कर छम त्रॅहन
लशि नारु जॉजिनस, म्यूलुम ओश तु अन्न



आदन बाजि म्यानि यारो वे

अँर्यनिमाल

हा व्वलि म्वन्य ? हो वंदय पादन
आदन बाजि म्यानि यारो वे

आदनु ऑसुस रँजलु ? नादन
यावुनस कदुर नो जॉनिय मे
दित्तुमो दरशोन छम चॉन्य लादन
आदन बाजि म्यानि यारो वे

कुकिलि पीर्य कवु त्रॉविथ क्वलुरादन
दुकलि व्वंदु म्योन गव
मे कलि चानि ब्रॉथ्य गॉम नादन
आदन बाजि म्यानि यारो वे

घेनतो लडुर्य पोश फोल्य क्वलुरादन
अज्ज छुम आदन, वातुहम हय
दिहँमय दरशोन सर वंदय पादन
आदन बाजि म्यानि यारो वे

★ ★ ★ ★ ★

वुज़मलु ज़न द्राव अर्यनिमाल

चमकान ओबरु तलु वुज़मलु ज़न द्राव
आयि ग्रायि छायिगँत्य करान ज़न आव

डोटु फोल किथु रूद नबु नार बरान
गगरायि करान ज़ोल ज़न वाव
नेहुछति अनिगटि मुशनस शामन
मे बॉल्य थोवनम सुय आमताव



गुं गुं मो कर यँदरो
अँर्यनिमाल

गुं गुं मो कर यँदरो
कनुर्त्यन पँगलिलय मलयो

रबि तलु कौर तुल हा सौँबुलो
यँबुरज़ल प्यालु ह्यथ गिरान छय
हियि थँर छस तय दुबारु फवलुयो



यारु लोल हो आम चोनुय

अर्यनिमाल

कावु रंग कोरथम हावू दीदारो
यारो लोल हो अअम चोनुय

छांडान लूसस गामु शहारो
डेछा ? सौरिय, ज़ेय हू नु कांह
तनि तोफ लॉयिथम गुलि बॉबूरो
यारो लोल हो आम चोनुय



आशो वे अर्यनिमाल

आशावादन हुंदि आशो वे
गटि मंजु हावतम गाशो वे

लासन ? गोमो राशो वे
गिरान छसयो आशो वे
म्यत्रन हुंदुय ब्योला वॅविजे
शॅथरन ति वॅर्यजि नु नाशो वे



बालि राह क्या छुमय

अर्यनिमाल

ज़ार वनतस हा वेसी
बालि राह क्या छुमय

आरु रोस्त गॅछिथ रूदुम निशि परज़्यन
नार गौडुनम यनु बूजुम निशि परज़्यन छुमय

तनु हय वेस्य तमि दादि छुम नु पकान
मे छु तमना बालि तँहुंद, निशि यार गोछुमय

★ ★ ★ ★ ★

वोद अमि कुकिले

अँर्यनिमाल

वोद अमि कुकिले दिल म्योन दोदुय
हा वँम्यू रिद्य बूज़ म्योन कुकू कू

लॉलि तु मजनून्य नरदस गिंदुय
त्रोवुन शशपंज प्योस दुखाल
लॉलि हुंद हावसा दावस लोगुय
वुछ तु वेस्य यार म्योन च़ोलुय

यार दय ? स्यठाह म्वलुलुय छुम
रछाम नालु तु वुछनम होलुय



छोलुम तु छोकुम अर्यनिमाल

वनतु कवय दूरि रूदुम
यान्य मे मोलूम तूरी छांडुन ?
दोब्य वानु छोलुम तु छोकुम
कूठ प्योम यारु दोद
छलु-छोक ? नाहकय रॉविम



म्योन ह्यू कस गव

अँर्यनिमाल

अस मय वेसी म्योन ह्यू कस गव
यस गव मसवलि ग्वंदुर हवॉय ?
रोबु खानु बिहिथुय दँरीचस ठस गोम
ज़ोनुम सुय मा आंगन च़ाव
यार नय ड़्यूतुम वॉलिंजि च़स गोम

★ ★ ★ ★ ★

म्योन वतन

अब्दुल अहद आज़ाद

तोशान क्याह छु पोशन, म्योनय वतन मुबारक ।
कॅर्यतोस रोशि रोशे, पोशे वतन मुबारक ॥

नुंदबोन क्याह वतन म्योन, वुछ वुछ पचलान बदन म्योन ।
क्वरबान यि जुव तु मन म्योन, अमिचन वतन मुबारक ॥

छिस बॉगरान मुहब्बत, बुलबुल कुमिर करान गथ ।
छिस प्यालु ह्यथ अथन क्यथ, पोशे चमन मुबारक ॥

छिस बेकरार आरु, ह्यथ लोलु खारु खारु ।
बोसु करान वारु, कोह दामनन मुबारक ॥

सब्ज़ार फर्शे मखमल वथरुन शिहिल्य कुल्यन तल ।
मर्गन नयन तु डारन, वार्यन वनन मुबारक ॥

वुछ सब्ज़ शॉमियानु, नुंद बॉन्य सायबानु ।
यिम लोलु सानि पानु गँड्य क्वदरतन मुबारक ॥

यिमु पोशि लंजि ग्राये, मारान कमि आये ।
हू हू करान दाये ज़न मिसुमन मुबारक ॥

शबनम छकान जवॉहिर, पोशन छि रोशि रोशे ।
कोचन वतन छकान पोश, मुश्के खतन मुबारक ॥

कथ सरहदस छि यिथ्य गोश, कथ वारि मंज छि यिथ्य पोश ।
पॅल्य पॅल्य यिवान दिवान जोश, बॅर्य बॅर्य चमन मुबारक ॥

प्रथ तरफु जोयि लारान, आरु कत्यन छि छारान ।
प्रथ जायि नाग प्रारान, त्रेशि हत्यन मुबारक ॥

पम्पोशि डल छि खामोश, ज़न रूठ्यमुत्य रडटिथ बोश ।
पां चादरन यिवान जोश, प्यठ संगरन मुबारक ॥

त्रॉविथ गर्ज तु हावस, लोलाह बु बॉगरावस ।
कमि रायि बो थावस, जुव आयतन मुबारक ॥

तिम प्रॉनि दास्तानु, गव सुत्य ह्यथ ज़मानु ।
नॅव्य नॅव्य परस तरानु, नॅव्य नॅव्य स्वखन मुबारक ॥

रोज़्या सु इन्तिज़ारस, अथ श्रावनस तु हारस ।
यस दर्द नवबहारस यिथ्य गुल पचलन मुबारक ॥

ऐ दिल च़ गछ मु व्वबॉल्य, पॉराव लोलची डॉल्य ।
आलव दिलक्य गछन कॉल्य, दिलु क्यन कनन मुबारक ॥

खोचुन डरुन च़े कुस छुय, रुत फल मेहनतस छुय ।
हुबे वतन च़े बस छुय, दौपनम मनन मुबारक ।

आज़ाद छी नु दनु द्यार, वतनुक च़ु छुख वफादार ।
तन दिथ तवय वतनदार, चान्यन कथन मुबारक ॥



शमा

अब्दुल अहद आज़ाद

होश कर पाँदु लोलु देवानय ।
गोश थाव बोज़ अफसानय म्योन ।।

येमि यकसानुकि हालि माँदानय
कुस पनुन कुस छु बेगानय म्योन ।
युथ मे निश ह्यौद तु त्युथ मुसलमानय
गोश थाव बोज़ अफसानय म्योन ।।

दीन म्योन मिलुच्चार दर्म यकसानय
सारिनुय क्युत छु नूरानय म्योन ।
युथ मे निश काबु तु त्युथ बुतखानय
गोश थाव बोज़ अफसानय म्योन ।।

वदुनस म्यौनिस असुवुन तरानय
गमुसुय मंज़ छु शौद्यानय म्योन ।
अदु गॅय रोशन चॉन्य गटुखानय
गोश थाव बोज़ अफसानय म्योन ।।

गथ करान लोलस दोद अकी आनय
जान क्याह लोलु देवानय म्योन ।
म्यौन्य पाँठ्य दज़ु दज़ु छुन नु प्रथ आनय
गोश थाव बोज़ अफसानय म्योन ।।

गटि मंज़ु बो छुसय गाश हावानय
सोज़ि दिल साज़ो सामानय म्योन ।

कति क्याह येति योर ज्ञानख पानय
गोश थाव बोज़ अफसानय म्योन ।।

बोज़वुनि सोज़ म्योन छुय नु कुनि वानय
दीदव वुछ च़ दास्तानय म्योन ।
लोलुकिस नारस नूर ननिवानय
गोश थाव बोज़ अफसानय म्योन ।।

क्वदरतन द्युतुनय गाश इनसानय
ज्ञाननुक थोवुनय बहानय म्योन ।
लाग ?? चानि छुस बो ति अख दानय
गोश थाव बोज़ अफसानय म्योन ।।

आज़ादु मीठ्य क्याह चॉन्य यिम तरानय
त्रे ल्यूखुत जान अफसानय म्योन ।
दज़नुक दोद ज़ानि दोदमुत पानय
गोश थाव बोज़ अफसानय म्योन ।।



ग्रीस्य नामु

अब्दुल अहद आज़ाद

ख्वदायन जुव दितुम पँज्य पॉठ्य, तिहुंजुय मेहरबॉनी छम ।
वले बाक्युय यि आसुन गोछ, स्व पनुनी जान फिशॉनी छम ॥

वनय कोताह थवख क्याह याद बोज़ख कुत्य अफसानु ।
पनुन्य मुश्किल कहॉनी याद सरतापा ज़बॉनी छम ॥

न छुस शॉयिर न छुस अफसानु लेखन वोल नय ऑलिम ।
न हावस बॉतु बॉज़ी हुंद न यिवान शारखॉनी छम ॥

गँमुत्य सुराख सीनस छिम तु नयि हुंद्य पॉठ्य नालान छुस ।
न छुस नोजुख तबीयत नय तगान नोजुख बयॉनी छम ॥

ग्वलॉमी हुंद्य ज़मानन सर्फु सुंद्य पॉठ्य नाल वोलमुत छुम ।
अँमी ज़हरन तु खोफन पॉदु वँरमुन्न नातवॉनी छम ॥

पँकीरी नातवॉनी मंज़ गँरीबी कम ज़बॉनी मंज़ ।
व्यपान कति काँसि हुंज़ ज़ोरावरी या पहलवॉनी छम ॥

ख्वदायन पॉदु वँर्य बाक्युय युहुंद रथ माज़ म्योनुय खून ।
यिवान ऑसुम नु च़ख बिलकुल वलेकिन व्वन्य यिवॉनी छम ॥

वुछान छुस यथ ज़मानस कुन, नज़र त्रावान पानस कुन ।
तिमय दुश्मन यिमन किन्न वक्फ थॉवमुन्न जिंदगॉनी छम ॥

गॅरीबन ग्रेसत्यन हुंज़ तरजमॉनी शूबि आज़ादस ।
पसंद कौं च़ाह यिवान तहँद्यन खयालन हुंज़ रवॉनी छम ॥



दिलस मंज़ इज़तराबाह छुय, हुबाबन हुंद हिजाबा छुय ।
यि सोरुय म्यूठ खाबा छुय, च़ु गछ बेदार इन्सानो ॥

जिगर पारन तु गमख्वारन, रँफीकन दोस्तन यारन ।
जिगर किथु पॉठ्य कतरावन, च़ु छुख खूनख्वार इन्सानो ॥

दिवान छुख पनुनिसुय बागस च़ु मूलन द्रोत पॅत्रन सग ।
गरस पनुनिस च़ु छुख पानय करान लुर पार इन्सानो ।

दितुय हॉविथ च़े आज़ादन, छु क्याह इन्सानु सुंद आदन ।
च़ु नय कन थावुहस नादन, ग्वबान छुय बार इन्सानो ॥



बु नो ज़रु अँश्कु बेमॉरी

अब्दुल अहद आज़ाद

मदनवारो लगय पॉरी। बु नो ज़रु अँश्कु बेमॉरी ॥

चे सुत्य गछि फुरसथाह आसुन्य
दिलस गछि फरहथाह आसुन्य।
मे गॉमुन्न नॉल्य नादॉरी
बु नो ज़रु अँश्कु बेमॉरी ॥

चे छय ऑशु मत्यन सुत्य लय
छुहख चावान वसलुक म्वय।
मे प्यठ कति वाति अनवॉरी
बु नो ज़रु अँश्कु बेमॉरी ॥

चे छुय जुल्फुक तु खालुक गम
मे छुम मोसूम अयालुक गम।
बु छुस मिसकीन चु दरबॉरी
बु नो ज़रु अँश्कु बेमॉरी ॥

खज़ानन ठान मुन्नरोवुथ
बेयन क्युत स्वन तु र्वफ थोवुथ।
मे क्युत ओसुय हरुद हॉरी
बु नो ज़रु अँश्कु बेमॉरी ॥

जदस युस आलु मटि ओसुम
वुनिस ताम सुय नखस प्यठ छुम ।
बु क्याह हावय दिलावॉरी
बु नो ज़रु अँशकु बेमॉरी ॥

यियम येलि राखु फारिश्टर
दिमख नय केंह अनन रेंजर ।
गछ्यम विरि ज्युन ति सरकॉरी
बु नो ज़रु अँशकु बेमॉरी ॥

पकुन छुम कारो बेगारस
बरुन छुम जिन्स सरकारस ।
यियम वुगरायि बापॉरी
बु नो ज़रु अँशकु बेमॉरी ॥

पगाह छुम हेंदयि द्युन पीरस
थव्यम कन तोबु तकसीरस ।
कयामेंच दूह कर्यम यॉरी
बु नो ज़रु अँशकु बेमॉरी ॥

हँडिस करि हून, हूनिस हॉड
कँडिस करि पोश पोशस कौड ।
करुन छुम रॉज्य पटवॉरी
बु नो ज़रु अँशकु बेमॉरी ॥

बु करु यीचन बलायन क्याह
खुर्यन पनुन्यन तु न्यायन क्याह ।
मे छम जँख्य जँख्य ति बेकॉरी
बु नो ज़रु अँशकु बेमॉरी ॥

वनान यिम दूरि छिम जॉहिल
दितख इन्सानु सुंद ह्यू दिल ।
दिहख नय अँछ, दितख टॉरी
बु नो ज़रु अँशकु बेमॉरी ॥



विग्यनि वनवुन

अब्दुल अहद आज़ाद

लोलु बागस आवय नोव बहार वेसिये ।
नेरी छावुनि गुल तु गुलज़ार वेसिये ॥

आयि पॅल्य पॅल्य पोशिवुनि पोशिवारे
द्रायि छावान लछि बज़ अछुदारे ।
जायि जायि फीर्य मुश्कून्य दार वेसिये
नेरी छावुनि गुल तु गुलज़ार वेसिये ॥

त्रावी प्रॉन्य कुसु तय अफसानय
त्रावी ज़ॉल्य ज़ॉल्य पंजरु तु ज़ोलानय ।
छावी यावनुक श्रावुन तु हार वेसिये
नेरी छावुनि गुल तु गुलज़ार वेसिये ॥

करी परवाज़ लॉगिथ सोज़ुक्य पर
फेरी थज़रन, पज़रुचि वुज़मलु कर ।
शोलुनावतख लोलु कोहसार वेसिये
नेरी छावुनि गुल तु गुलज़ार वेसिये ॥

छख च़ु तोशान साज़स तु सामानस
वाजि मरमन तु बेयि र्वनि दामानस ।
यि छु सौरुय नापायदार वेसिये
नेरी छावुनि गुल तु गुलज़ार वेसिये ॥

पायदोरी छि नावस तु वरतावस
न जि स्वरमस, तु साजस, पाँरावस ।
पोशिवुन छा यि जोशिवुन नार वेसिये
नेरी छावुनि गुल तु गुलजार वेसिये ॥

छख च्च हुस्नुक तु लोलुक अफसानु
बन मु असनुक तु गिंदनुक सामानु ।
पानु गुलशन पानु छख बहार वेसिये
नेरी छावुनि गुल तु गुलजार वेसिये ॥

पोशि मालस छि ऑशिमॅत्य लूख छावान
म्वख्तु हारन छि प्वख्तु कार म्वलुनावान ।
तोशी पोशन बन च्च म्वख्तु हार वेसिये
नेरी छावुनि गुल तु गुलजार वेसिये ॥

ग्रीस्य कूराह ऑस चंद्रहारच जून
शाह यूसुफुन्य माशोक हब्बु खातून ।
गाटुजारनुय वॅर स्व नामदार वेसिये
नेरी छावुनि गुल तु गुलजार वेसिये ॥

स्वन छु नर्मय नतु ओस यि ति सर्तल
छुनु लालस नरमी सुती म्वल ।
माने अमिकुय ज्ञानि दिल हुशार वेसिये
नेरी छावुनि गुल तु गुलजार वेसिये ॥

लोलु नादन गोश थाव आज़ादस
वुनि आदन ओसुय पतु सादस ।
छुय गॅनीमथ युथ वफ़ादार वेसिये
नेरी छावुनि गुल तु गुलजार वेसिये ॥



जानानु छुम नु बोज़ान

अब्दुल अहद आज़ाद

जानानु छुम नु बोज़ान सोज़ुक तरानु वेसिये ।
यिम दौद्य वॅकमिस रॅफीकस बॉविथ बु ज़ानु वेसिये ॥

ललुवान यि लोलु खंजर, वॉलिंजि छुम ज़लान शर ।
बेयि सोज़ि ना सु दिलबर केंछा निशानु वेसिये ॥

लॉगिथ बु नेरु सॅन्यास, फेरस वनन मॅलिथ सास ।
तस रोस यि स्वन तु अतलास, छुम जेलखानु वेसिये ॥

येलि ओस ताज़ु उल्फत, अॅनिमस नु रोबु कांह कथ ।
कुनि सातु गछ्तु पृछ्तस, ती गॉयिबानु वेसिये ॥

क्याहताम खारु ओसुस, ग्वडु वॉजिनस बु नावे ।
व्वन्य छुम करान सितमगर, कम कम बहानु वेसिये ॥

रोवुम मे बालु यस पथ, यावुन अराम तु राहत ।
ऑसुम तु छम तॅहुंज़ सथ, गंज तु खज़ानु वेसिये ॥

छस मॉर्य मॅज़ अवारु, करि ना सु म्योन चारु ।
वॅनिज्यस च़ वारु वारु मोदरे दहानु वेसिये ॥

काबस अंदर च़ बद मस, प्यठ मिम्बरन च्यवान मस ।
तिमु स्वरमु छेश्मु डीशिथ, सपनान गुमानु वेसिये ॥

कुनि छुम नु ड्यूठमुत ज़ांह, त्युथ ब्याख नाज़नीनाह ।
रावान छुस वनय क्याह तँम्य सुंद निशानु वेसिये ॥

या म्यॉन्य सितम तु बेदाद, नतु आरु कोत सु आज़ाद ।
कुनि सातु छिम यिवान याद तिम दास्तानु वेसिये ॥



वॅरुथ बे-वफॉयी वफादारु म्याने

अब्दुल अहद आज़ाद

वॅरुथ बे-वफायी वफादारु म्याने ।
सितमगारु बा-आरु ल्वकचारु म्याने ॥

करय पोंपरिन्य गथ बु अथ शमा रोयस ।
दमाह रूबरू बेहतु महपारु म्याने ॥

कमस स्वंदरन सुत्य यारानु लोगुथ ।
थोवुथ खारु ललवुन मे गुलज़ारु म्याने ॥

बरान शॉद्य यिम दॉद्य रछि हा दिलस मंज़ ।
चु योद यारु वनुहख मे बेमारु म्याने ॥

यि छुय म्योन सर तु यि छुय म्योन सीनु ।
तुलान क्याज़ि तलवार छुख खारु म्याने ॥

छिहम वादु वॅर्य वॅर्य करान ज़िंदु मॅर्य मॅर्य ।
प्यवान पूरि क्याह छय च़े आज़ारु म्याने ॥

मदनवारु च़ोलुहम बदन नारु ज़ॉलिथ ।
ख़दा रहम वॅरिनय मुदावारु म्याने ॥

सु जानानु मुश्ताक ज्ञानानु पानस ।
वनान यस यि आज़ाद गमखारु म्याने ।



बुछन कर गुलबदन

अब्दुल अहद आज़ाद

बुछन कर गुलबदन गुलफाम लँतिये ।
पँरी सूरत पँरी अंदाम लँतिये ॥

सिरुक सरपोश तय नाज़न खँरीदार ।
कनुक स्वन तय मनुक आराम लँतिये ॥

बु सोज़स लोलु नाबद ऑलु शीरीन ।
खँज़ुर जलगोज़ तय बादाम लँतिये ॥

कसम द्रिय ह्यथ द्युतुम तस कॉफिरस दिल ।
खबर छनु आसि क्याह अंजाम लँतिये ॥

हवस छुम तनि तन लॉगिथ वनस हाल ।
बँनिथ कॉफिर अँनिथ इस्लाम लँतिये ॥

अँछन तल सातु सातय छुम तसुंद रोय ।
निहस ना बस युतुय पॉगाम लँतिये ॥

लछे वँरनस हन्ने न्यूनम वँडिथ स्वन ।
यछे लोलस यि क्याह फल द्राम लँतिये ॥

दशि गंडुनॉवनस प्रथ आस्तानस ।
जहानस दशिर्नॉवनस खाम लँतिये ॥

छु नादान बुलहवस कॉफिर ग्वनाहगार ।
मलामत आशकस छा पाम लॅतिये ।।

बुछुम येलि यार सूरत ओस आज़ाद ।
रिवान ह्यू अज़ मे बोज़नु आम लॅतिये ।।



व्वलो मो रोश

अब्दुल अहद आज़ाद

अमारय चानि गौडनम जोश
व्वलो मो रोश बु मारय पान ।
चु छुख म्यान्यन सिरन सरपोश
व्वलो मो रोश बु मारय पान ।।

वंदय येमि शुर्य पानुक संज़
बु ललवथ लालु दीदन मंज़ ।
शूबख चुय अथ डलस पम्पोश
व्वलो मो रोश बु मारय पान ।।

चु गोमुत नावु सॉलन मस्त
चे प्रारान प्यालु ह्यथ दर दस्त ।
निशातुक्य शालुमॉरुक्य पोश
व्वलो मो रोश बु मारय पान ।।

यि बदनुक जोश तु अँदर्युम ज़र
यि छुम दिलदारु चोनुय शर ।
लुकन हुंज़ु पामु चोन खामोश
व्वलो मो रोश बु मारय पान ।।

बु क्याह हावय वॉबीलु तु क्रोन
च्यतस पाव यारु यावुन म्योन ।
लगय पॉरी कम्पुक छुय बोश
व्वलो मो रोश बु मारय पान ।।

पोतुस पथ ज़र्ब छुख लायान
यि म्योन संतूरु दिल वायान ।
बिहिथ परदन अंदर रोपोश
व्वलो मो रोश बु मारय पान ।।

योहय छा बुलबुल आज़ाद
छु युस मंज़ लोलु बागस शाद ।
यिवान होशस गछान बे-होश
व्वलो मो रोश बु मारय पान ।।



लोलु चूरो म्योन दिल चय

अब्दुल अहद आज़ाद

लोलु चूरो म्योन दिल चय, जान चय, जानानु चय ।
आशाना चय, बेवफा चय, यार चय, यारानु चय ॥

यावनुक देवानु हावस, शुर्य पानुक मूरि नार ।
फितनु चय, बाज़ार चय, कुस्सु चय, अफसानु चय ॥

आरुवलनुय खारु चाने, पारु पारु गॅय जिगर ।
नारु आँशकुनि बुलबुलन हुंघ दिल करान बिर्यानु चय ॥

राज़ बावान सोज़ चोनुय साज़ क्यन परदन अंदर ।
परदु चय, आवाज़ चॉनी, साज़ चय, सामानु चय ॥

कस वनन अहवाले दिल, यिम ज़ालु लॅग्यमुत्य जानवार ।
वाल वाशि तु ज़ाल चोनुय, वाल बॅर चय, दानु चय ॥

जेरु चाने शेर दिल नेरान मॉदानन अंदर ।
राज चय, ताराज चय, जंजीर चय, ज़ोलानु चय ॥

क्याह छु फुरकान, क्याह छि गीता, क्याह छि पूजा, क्याह नमाज़ ।
दर्म तु इस्लाम चोनुय, काबु तु बुत खानु चय ॥

गाटु पावान गाटुल्यन चोनुय यि सोदा दिथ फरेब ।
आशकन हुंदिस जनूनस, दौलतुक सामानु चय ॥

वलवला सोजुक तुलान आज़ादुनिस सीनस अंदर ।
गाह नेरान पर्दु थॅव्य थॅव्य, गाह यिवान ननिवानु च्युय ॥



कर साँ म्योन न्याय अंदे

महमूद गाँमी

कर साँ म्योन न्याय अंदे। मॉर्य मंदे मदनवारो ॥

छोंडुमख हनि हने, वनि आहम नो वफादारो ।
गोछुहम ब्रोंठु कने, मॉर्य मंदे मदनवारो ॥

शबु अकि यूर्य यितम, यारु म्याने सितमगारो ।
रोशि दीदार दितम, मॉर्य मंदे मदनवारो ॥

स्वनु छम पामु दिवन, कामुदीवो जानावारो ।
तनु वोतुम मे रिवन, मॉर्य मंदे मदनवारो ॥

दिल जान न्यूथ छलय, बेयि वनतु बु क्याह दारो ।
यिनु चानि सुम्बलय, मॉर्य मंदे मदनवारो ॥

कवु छुख दूर चलन, मे गँयि चॉन्य कल वारो ।
करु क्याह लॉन्य छलन, मॉर्य मंदे मदनवारो ॥

खस्तु दिल गँयसु खराब, मसु छॉवथस शराबखारो ।
छावतो ही तु ग्वलाब, मॉर्य मंदे मदनवारो ॥

कवु कँरथस बु गटे, हटि तल के म्वख्तुहारो ।
गंडुथो अकि लटे, मॉर्य मंदे मदनवारो ॥

छोंडुमख सरहदन, कवु ज़ोलथम बदन नारो ।
तनु वोतुम मे रिवन, मॉर्य मंदे मदनवारो ॥

आव महमूद गदा, ज़ार वनान ज़ोरावारो ।
बोज़तम बहरे ख़्बदा, मॉर्य मंदे मदनवारो ।।

★ ★ ★ ★ ★

कत्यू छुख नुंदबाने

महमूद गॉमी

कत्यू छुख नुंदबाने। व्वलो माशोकु म्याने।।

ब सूरथ छुख च़ु पॅरी, च़े शूबनय जामु जॅरी।
कॅम्यू तॉवीज़ कॅरी, व्वलो माशोकु म्याने।।

च़लोनय पज़िही नय, कवो ज़ोलुथ मे सीनय।
च़े क्या गोय म्योन कीनय, व्वलो माशोकु म्याने।।

मुकामन दूर छुखय, बु आसय बारु बुखय।
मरय मा च़ानि म्वखय, व्वलो माशोकु म्याने।।

फिराकन चॉन्य गोलुस, द्यमागन मद वोलुस।
खुमारन चॉन्य ज़ोलुस, व्वलो माशोकु म्याने।।

मुकाबल ऑस्य आसन, अँकिस अख लोल कासन।
सु अरमान रूद खासन, व्वलो माशोकु म्याने।।

बुछान मे लोसु अँछुय, च़े क्याह गॅयि मनि मँछुय।
यितम अज़ ज़ून पछय, व्वलो माशोकु म्याने।।

खसख ना यारुबॅली, बु छलुहय खोरु पॅली।
मे नो यिम दाग च़ॅली, व्वलो माशोकु म्याने।।

बु वुछहय हुस्न-ने-जमाल, बुछान छुम जुल्फ तय खाल।
छि ज़ॉलिम बॅल्य वलान नाल, व्वलो माशोकु म्याने।।

शराबुक्य प्यालु बरुयो, ग्वलाबन मालु करुयो ।
पगाह या कौल्य मरुयो, व्वलो माशोकु म्याने ।।

व्वलो महमूदु मो रोश, दितुय च्चे साहिबन होश ।
जुदौयी कर फरामोश, व्वलो माशोकु म्याने ।।



बु छस चॉन्य तलबदार

महमूद गॉमी

बु छस चॉन्य तलबदार, कत्यू यारु प्रारुयो ।
करान छस बु इन्तिज़ारु, कत्यू यारु प्रारुयो ॥

छुय च़े यूसफुन अनहारु, मँच़ बु कॅरथस जुलेखा ।
च़ नय यिख तु बु पान मारु, कत्यू यारु प्रारुयो ॥

खबर ह्यम तु छस बेमारु, खबरि ज़ांह ति आहम नो ।
जिगरस पारु कॅर्यथम वारु, कत्यू यारु प्रारुयो ॥

हटि तलुकि म्वख्तय हारु, कनुक स्वन जरय च़े ।
म्वल करय लाल बाज़ारु, कत्यू यारु प्रारुयो ॥

हा सम्सारु बॉज़ीगारु, च़े क्याह खास सोदा छुय ।
पतु बो लागय खॅरीदारु, कत्यू यारु प्रारुयो ॥

महमूद गॉमी वनान ज़ारु, दाद्यन दवा छ़ांडान छुय ।
लिल्लाह हावतम दीदारु, कत्यू यारु प्रारुयो ॥



अर्यनि रंग गोम श्रावन हिये

महमूद गॉमी

अर्यनि रंग गोम श्रावन हिये । कर यिये दरशुन दिये ॥

म्वख होवनम बुर्कय तॅली, छ्वख दिथ यार च़ोलुम छॅली ।
वुछतु तिहुंजय अपुज़ द्रये, कर यिये दरशुन दिये ॥

छायि रूशिथ गोमय अपॉरी, पायि बडिस लगस बु पॉरी ।
रोशिवुनिस ख्वश आव यिये, कर यिये दरशुन दिये ॥

मॅचरॉविथ न्यूनम स्वने, बु ति करहॅस रोयस म्वने ।
गोम त्रॉविथ रचन बिये, कर यिये दरशुन दिये ॥

सॉल्य सिंगार छुस क्याह ज़लन, छुस नु मे कुन दिल तस रलन ।
वॉल्य कनन मे बॉलिये, कर यिये दरशुन दिये ॥

मॉरनस अॅम्य दावादारन, म्वख्तु हारस छस कूत गीरन ।
च़्वंज़ु रूज़ुस बु बंदुगिये, कर यिये दरशुन दिये ॥

रुमु ज़ॉविजि बुमय वंजे, छुम करान वॉलिंजि खंजे ।
सज़ु पोश छिस व्वज़ॉलिये, कर यिये दरशुन दिये ॥

म्वख्तु नूरस, पोंपूर दशन, सोख्तगी नो मे ज़ांह मशन ।
प्वख्तु कारस ख्वश गोम यिये, कर यिये दरशुन दिये ॥

ज़रु ज़ॉजिथस कोताह ज़रय, बरु अन्नतम हा दिलबरय ।
महमूदस अरमान छुये, कर यिये दरशुन दिये ॥



गम छुम यार मा रावे

महमूद गॉमी

ब्रम दिथ वॉजिनस नावे । गम छुम यार मा रावे ॥

अँद्य अँद्य फिरुस बागस, यार छुम मंज़ बाग नागस ।
पम्पोश मारान ग्राये, गम छुम यार मा रावे ॥

हाँजो नाव छय बहानय, तारु वोल तार दियि पानय ।
हम खूर नम रठ नावे, गम छुम यार मा रावे ॥

केंह आयि सॉलस सवॉली, केंह गॅय सालु निशि खॉली ।
केंचन नु मेलान जाये, गम छुम यार मा रावे ॥

मोसूम जुव म्योन थारान, कांदुर्य वानु तलु प्रारान ।
लॉजिनस तुंदरने तावे, गम छुम यार मा रावे ॥

अँद्य अँद्य फेर्योस बालस, वलनय आस कॅड्य ज़ालस ।
अति नो म्वकलन पाये, गम छुम यार मा रावे ॥

व्वलु वेस्य गछवय सॉलस, हज़रतबलु किस मॉलस ।
डलु मंज़ दीदार हावे, गम छुम यार मा रावे ॥

ज़ायोस मॉलिस तु माजे, तिम छिम अरबुक्य राजे ।
तिम छिम वुछान पोत छाये, गम छुम यार मा रावे ॥

? ? काँटु मालाह दूर कन, थफ दिथ नीनम आशकन ।
बँज़रिथ चैयिनम चाये, गम छुम यार मा रावे ॥

अँद्य अँद्य फ्यूरुस बवसरस, यारि दादि दप्याम मँज्य तरस ।
तरुनस ऑसुम नु जाये, गम छुम यार मा रावे ॥

महमूद गॉमी बस युतुय, अँशुकुन ताकत वँम्य द्युतुय ।
वौनमुत मा मँशरावे, गम छुम यार मा रावे ॥



चानि बर तल राव्यम रॉच्चय

महमूद गॉमी

चानि बर तल राव्यम रॉच्चय । आवाज़ वॉच्चय नो ॥

खॉस्य व्वज़ल्य बॅर्ग छॅच्चय, छस स्वर्गच यॅबुरज़ल ।
कॉल्य मेलव कयामॅच्चय, आवाज़ वॉच्चय नो ॥

च्चंज़ शूबय बु खॅदमॅच्चय, ग्रॅंज़ साहिबो हेच्चथ नु ज़ांह ।
अदु नाव प्योम ललु मॅच्चय, आवाज़ वॉच्चय नो ॥

वनु हा यॅच्च अॅश्कुनि ब्रॉच्चय, कन थाव महमूदस ।
कमन सूरतन गछान म्यॅच्चय, आवाज़ वॉच्चय नो ॥



कोनय आमय यार

महमूद गॉमी

वुछान बालि गोम शामय । कोनय आमय यार ॥

लीख्य लीख्य लदस नामय, लेखनस छुमनो वार ।
अन्य तोम नामु पॉगामय, कोनय आमय यार ॥

खाबस मंज़ डेंछामय, यावुन ब्रम बॉज्यगार ।
सुय खाब अपुज़ द्रामय, कोनय आमय यार ॥

ऑशि मोत अशि मुकामय, लशि ज़न गॉडनम नार ।
नारस सूर गॅयामय, कोनय आमय यार ॥

महमूद शहर तु गामय, साहिबस छुय वनान ज़ार ।
वेसिये हीलु वन्यामय, कोनय आमय यार ॥

★ ★ ★ ★ ★

द्वद च्यतो दामु दामु गलि गले

महमूद गॉमी

द्वद च्यतो दामु दामु गलि गले, हो हो बु करुयो अडुकले।
रछिथो ख्वनि कनि मंजुले, हो हो बु करुयो अडुकले।।

तल पातालय डेछोम खाब, खाबु मंजु गोस ना स्यठाह बेताब।
नागु प्यठु रोटुस ना वुजमले, हो हो बु करुयो अडुकले।।

बाबु म्योन यँद्राजु, शाह कॉजी, कस वनु अजलन दिचुम बॉजी।
पोशस नु अजलुनि हाँकले, हो हो बु करुयो अडुकले।।

रोय चोन फोलमुत गुलि अखताब, हूर-पॅरिया किनु छुख माहताब।
ग्वलाबु रूठहमो मसवले, हो हो बु करुयो अडुकले।।

लानि क्याह ओसुम, क्रानि द्रायस, दायितोन करुने योर आयस।
महमूद छु गोमुत गांगले, हो हो बु करुयो अडुकले।।

लोलु मंजु ललवथ मनकु फले। हो हो बु करुयो अडुकले।।



=====

Selected Poetry of Renowned Kashmiri Poets

Rewritten in Standardised Devanagari-Kashmiri by

M.K.Raina

Completed : 31.12.2004 ~ Updated 30.03.2020

=====